

14  
EXERCITATIONES  
THEOLOGICÆ  
DOGMATICO-EXEGETICÆ

ILLUSTRISS. AC REVERENDISS. D. D.

BERNARDINO MARINO  
EPISCOPO TARVISINO

*Duci Marchioni, Comiti &c.*

INSTITUTE

A D. JOSEPHO MONICO

Clerico Tarvisiano de Resio

F. DOMINICI MARIE FEDERICI

ORDINIS PRÆDICATORUM

IN SEMINARIO TARVISINO

DOGMATICÆ THEOL. ET HIST. ECCLES. PROFESSORIS

AUDITORE


*Facta cuilibet post Tertium argumentandi facultate*

---

TARVISI  
APUD JULIUM TRENTO 1789.

66  
*Errant (Novatores) veluti in mari magno,  
nec, quo ferantur, intelligunt.*

Laſt. Div. Inſt. Lib. VI. cap. 3.



## Æ PRÆFATIO Æ

**P**rimus jam elabitur annus, Illustriss. et Reverendiss. Præsul, quo instauratis Academiae hujus litterariæ studiis novis Scholarum institutionibus, novisque Magistris accitis me totum in Theologia Dogmatica, et Historia Ecclesiastica exercitatione, pro ingenii mei modulo, distinui, operamque navavi. Una hac dies est, qua pro more Scholæ nostræ studiorum meorum specimen Tibi Cultori vigilantissimo, Patrique solertissimo nunc dare publica Disputatione

de re.

*decretum est . Disputatione scilicet , qua dum vera Theologiæ Exegetica , et Dogmatica principia vindicare aggredior , audacissimorum hominum falsa detegam , et explodam . Fuere omni ætate , et modo sunt plerique , qui sese arroganter opponunt , audent impudenter , procaciterque adducuntur , ut Deum , omnemque Religionem , Evangelium , et Ecclesiam irrideant , atque blasphement , ut vincula quaque Religionis dirumpant , et effranem vivendi licentiam adoptent , cæterisque imponant , et adblandiantur . Quibus conatibus Societas ipsa pessimis moribus corrumpitur , et Religio omnis prorsus aufertur , et Virtus . Accedit , quod magna jam prodierit , majorque in dies prodeat pestiferorum Librorum fœda colluvio , quibus omnia Theologiæ principia susdeque vertuntur , cum ea obscurare , et labefactare viribus omnibus adnitantur . Quamobrem quanta sit studiorum nostrorum necessitas , quantæque utilitatis instituta hæc Disputatio , nemo non videt .*

*Disputamus namque , ut divinæ Revelationis necessitas , et existentia , ut Sacrorum Codicum tuto vera interpretatio haberi possit , ut naturalis , et revelatæ Religionis dogmata vindicentur , atque ab Adversariorum telo utrumque defendamus . Primum sacra Exegesis munus pandit , Dogmaticæ Theologiæ provinciam statuit alterum . Adversarios non quosdam , et cujuspiam ætatis , sed audacissimos omnium*

*Temporum expositis Exercitationibus convenimus. Sunt ex his aliqui, qui animorum futurique sæculi immortalitatem, et summi Dei existentiam, naturam, et attributa impiissime maculant, Atque, si se non profitentur palam, fovent tamen, et defendunt. Utroque Rationis, et Revelationis lumine hos omnes principiorum loco refellimus. Sunt alii, qui dum singula hæc admittunt, divinam tamen Revelationem supervacaneam, et hominibus prorsus inutilem, Deoque impossibilem dicunt, totique sunt, ut tantas vires adhuc in homine esse asserant, quod nativo Rationis lumine principia, et officia qualibet homo cognoscere valeat, et adimplere: et utinam ubi nata est superbiens, et fallax hæc opinio mansisset; sed quocumque, et ad nos pertransit; et quot inde errores! Novum scribendi ingenium invasit cunctos, enatis controversiis, disseminatis erroribus, mirum est quantum hæc illorum arrideat, et insedeat opinio. Itaque singula ad examen vocabimus, atque prima Exercitationum parte divinam Revelationem, non modo ad aliquas supernaturales veritates necessario detegendas, mysteriaque admittenda, sed etiam ad naturales, ad perfectam nimirum juris naturam, et gentium cognitionem, necessariam esse totis viribus defendemus.*

*Sed hæc divina Revelatio, bocce divina providentiæ beneficium omnibus præsto esse debet,*  
*scilicet*

factumque cum sit quonam loco, cui homini, genti, populo, quibus modis, quibusve Codicibus servatum dicemus. Hinc secunda Disputationis nostræ pars. Principio: omnium Religionis Dogmatum Revelatio integra et absoluta Adamo facta est, in posteros propagata, sed vitio, et negligentia hominum non parum obscurata, et corrupta; identidem per suos Prophetas, ac tandem per Jesum-Christum plenissime omnia Religionis arcana patefacta sunt. Manibus, pedibusque Deiste singula hæc inania, gratisque asserta esse, suadere conantur, sed infelicibus avibus. Divinam sane Revelationem in Veteris, et Novi Testamenti Libris divinitus custodiri dicimus, eorumque authenticam, integritatem sartam, testamque dabimus, Et dubia omnia, artes, fraudes, adversariorum, quotquot videre potuimus, nec paucos, sed non omnes vidimus, detegemus. Ad manus quippe quorundam levissimorum hominum, qui ut excellenti, delicatoque ingenio videantur communem bonorum viam quasi fastidientes, vix olfactis, ut sic dixerim, exterorum doctrinis infideles evadunt, et quod inde sequitur, vitiosissimi, ad horum, inquam, manus quænam, quæso, et in deliciis opera? Voltairus, Rousseavius, Bolingbrokius, Beausobrius, Mirabeavius, Freretus, Gibbonius, ut alios omittam; qui omni conatu Pentateuchum, omnesque Veteris Fæderis Libros,

erroribus

erroribus Fœdissimis conspersos exhibent, irrident; et quatuor Evangelia, omnesque Novi Testamenti Codices inter apocryphos habent, Criticisque argumentis viam sibi ostendunt, ut dubitent, immo suadeant Christianam Religionem non divinum & omnipotentis Dei opus esse, sed humanum, immo vituperandum. O genus hominum factiosum imperitia, cæcitate, et invidia blasphemum! Ad hos revincendos nostræ se convertent Excercitationes, ut Veteris scilicet, et Novi Fœderis codices, quatuor præsertim Evangeliorum, a recentium Criticorum dubitationibus vindicemus.

Postremum Elucubrationum caput adversus omnes Heterodoxos, recentesque vel inter Catholicos infensissimos Ecclesiæ Romanæ hostes arma sumet. Quot enim sistemata prodire, et prodeunt, ut sacrarum Scripturarum interpretationem, ab omni externo, infallibilique iudice liberent? Scripturæ textus omnes integra perspicuitate donatos, Spiritum uniuscujusque hominis privatum puram, nudamque Rationem ad sacram Hermeneuticam sufficere, qui nimmo liberum esse cuicumque sentire quid velit, audacter pronuntiant. Hinc Tolerantismo patefacta via, quo citius ad purum, putumque Deismum iter, quo Religionum Simultaneitas admittatur. Non ignota prosequor. Hinc vides, Macenas Ampliss., quot graves, et perniciosissimas Hæreses, quibus Novatores buc,

et illuc

et illuc Christi doctrinam impetunt, omnemque Catholicæ Ecclesiæ rem sus deque vertere, et in præceptis adducere contendunt. Vides Romanæ Ecclesiæ jura diminui, et infringi, omnemque Ecclesiasticæ Hierarchyæ dignitatem, majestatemque contemni. Nonne inde discordiæ ortæ, et adauctæ? Nonne quod modo viget, et alitur discordiarum gramen ubique serpit, crebroque novas spargit radices? Romanum Pontificem Christi Vicarium Petri successorem jure divino constitutum appello. Sed ut hoc negent illi, quot machinæ, et artes? Divum Petrum nec Romam adventasse unquam scripsere post Marsilium Mainardinum, et probare conantur Hæreticorum pessimi. Sin minus non fuisse Romanum Episcopum. Ast perpetua est omnium Patrum, et Historicorum traditio. Romanum Pontificem Cathedram Petri, sedemque ejus principem tenere; hæc est omnium Catholicorum sententia: ab hac Heterodoxi discessere, discedunt; sed a nobis secessere, et secedunt. Quid ergo dicemus de Anonymo, cateroquin erudito, Ecclesiasticæ Jurisprudentiæ nupero Auctore? Negat hic Divum Petrum Romanum fuisse Episcopum, Sedemque Romanam tenuisse unquam, Sanctumque Linum Divo Petro successisse negat; Clementi vero jam Romæ Episcopo jura Primatus Petrum, antequam decederet reliquisse. Novam hanc opinionem quocumque veteris traditionis fundamento destitutam,



omnium Patrum testimoniis oppositam, Hæreticis Blondello, Vedellio, Bebelio, Ittigio, Basnagio, Petrao, Pearsonio, aliisque unice consonam, operosa Exercitatione explodemus. Neque enim gravissimis his in rebus sine piaculo licet novam pro-cudere, et proferre sententiam. Nonne satis est, ut opinio aliqua vera dicatur, et totis viribus defendatur, quod Catholicorum omnium sententia sit, opposita vero Hæreticorum? At quo cum per-duxit novitatis amor! Scribat ergo in operis sui fronte, laudetque Vincentii Lirinensis dictum: Nove, non nova: sed prudens, et pius non apponendum sinat: Nove, non nova Hæreticorum opinio.

Hæc, Præsul Ampliss. studia nostra: his nam-que abnormes Deistarum, atque Heterodoxorum conatus, impetus, et fraudes sine ulla disputandi acerbitate, sed pacifica litteraria contentione com-primere, retundere, atque detegere aggredimur; Tuoque Nomine nos in singulare certamen com-mittimus. Et quidem si Animi Tui magnitudi-nem, si a Natura Ingenium, si rectum, atque expeditum Judicium tuum perpendimus, quis po-test esse unus, cui magis nos, laboresque nostros, immo laborum primitias commendare velimus? Omnium Princeps Seminarii tui, cæterarumque sacrarum Disciplinarum Parens Dogmatica Tber-  
logia, quam singulari quadam benevolentia prof-  
queris,

queris, publice conspectui tuo bodierna luce sese offert, et libentissime sistit. Sistit profecto in tam magno Litteratorum confessu, si non Orationis deliciis, certe gravibus verisque sententiis, propriis, accomodatisque argumentis locutura. Locutura non destituta omni Dialectica prasidio, quo delicatuli aliqui, si non malo dolo, eam aspernandi causam arripiunt; sed ita, ut Disciplina sua principiis uti, fidei dogmata exponere, atque tueri valeat Theologus, quæ non ageret, si foret ille Dialectica rudis. Locutura, posthabitis aridis illis, ut vocant, Metaphysicis quæstionibus, non de verborum, sed de rerum delectu sollicita. Locutura tandem, non ut laudes tuas copiose, ornateque recenseat, neque enim earum locus est; satisque est eam ipsam tuis auspiciis ali, et loqui, ut tibi obsequii, et venerationis officium, tribuat; et si quantum debemus non possumus, videamur saltem, quod posse novimus, non refugisse.

# THEOLOGICARUM EXERCITATIONUM

## PARS PRIMA.

### DE PRINCIPIIS DIVINÆ REVELATIONIS:

#### I.



Vulgata est Theologiæ partitio in naturalem, & revelatam, quarum una solo rationis lumine veritates plures, quæ Deum respiciunt ostendit: altera vero, quæ Deum ipsum supernaturali lumine spectant contemplatur: vulgata quoque legis divisio in naturalem, & supernaturalem, ut illa practicis veritatibus rationis lumine hominem ad ultimum finem dirigat, alia vero gratiæ, & revelationis auxilio hominem ipsum ad veram felicitatem ducat, et opituletur. Ex quibus præstantes Viri Religionem ipsam partiti sunt in naturalem, & revelatam, ut prima circa Deum, et hominis officia, rationis lumine instituat; alia vero circa eadem supernaturali manifestatione versetur. Licet singula hæc optime definita habeantur; certum tamen exploratumque est Theologiæ naturalis Theoremata, Legis naturalis præcepta, Religionis naturalis officia, et finem ad præsentis vitæ statum nec perfecte, nec satis esse ut propterea revelatio admittenda est. Neque enim homines unquam sine revelatione exsistere, ac propterea nunquam sola naturalis Lex, naturalisque Religio sufficit. Ex parte igitur Dei, et hominis revelata Theologia perquirenda. Falluntur ergo Deistæ perfectam Religionem naturalem sufficere omnino ut bene beateque vivatur: falluntur quoque si qui sunt Theologi, qui Religionem naturalem extitisse aliquando consentiunt: Quamobrem veram Religionem nonnisi revelatam esse dicimus, cum verus unicus finis ultimus hominis supernaturalis sit. Si ita tamen loquuntur, ut nihil aliud innuant, quam in Religionem contineri veritates, quæ ordinis sunt naturalis, atque hoc sensu admittant Religionem naturalem, non dissentimus: etenim et nos duo totius Christianæ Religionis principia

admit-

admittimus, lumen scilicet, revelatum, et rationis. Illud Naturalistæ penitus auferunt, istud enthusiastæ exulant, et persequuntur: utroque tamen Theologus instructus esse debet. Nostræ itaque exercitationes Theologicæ, quas singulari certamine exponimus, ex revelationis fontibus, & humanæ rationis argumentis quantum fieri potest demonstrabuntur. Sint itaque publice defendendæ.

1. Veræ Religiõnis, et Christianæ Theologiæ veritatẽs plures; ac primo Dei existentia fidei, et rationis lumine demonstrantur.

2. Litterati, et illitterati homines, licet circa certitudinem evidentiæ non parilis sint conditionis, circa certitudinem fidei æqua est utriusque conditio.

## II.

Dei existentiam adversus Atheos demonstraturi non bene se gerunt illi, cætoroquin docti, qui novas demonstrationes exhibent, cum infirmis id agant argumentis. Ex idea nempe innata Entis perfectissimi: ex possibilitate Entis æterni, ex æterna Mathematicorum Theorematum veritate depromunt argumenta. Nihil, vel parum agunt, cum Athei respondeant, supponi id, quod est in quæstione. Hujus generis et illa est, quæ ex minima actionis quantitate in mundi productione consumpta, instituitur. Veritas omnium veritatum fons invictis ostendenda est argumentis. Etsi enim Atheum theoreticum dari posse negemus: dixit tamen insipiens in corde suo: non est Deus. Sed ex scriptis pæstilentissimis argumenta parantur, ut demonstrationes pro Dei existentia facili negotio retundantur. Quare satis mirari non possumus Theologos quosdam, qui receptas demonstrationes infirmare studium omne impendunt, & labores utrosque errare turpissime defendimus, & argumentis undequaque desumptis supremi Numinis existentiam demonstrabimus. Ex iis quippe, quæ videmus, et facta sunt, quod non videmus, et factum non est ostenditur. Tota qua late patet Physica excurrenda esset ad argumenta danda tantæ veritatis, et qua par est dignitate, et copia pertractanda. Sacræ Litteræ, Sancti Patres, Philosophi insigniores, ex multiplici creaturarum enumeratione mirabiliter rem conficiunt, adeo ut aliqui vel ex monstris, et monstrosis effectis justum, et optimum Numen demonstrant: dum alii ex corporis humani structura, ex corporibus cælestibus, ex insectis, ex mundouniverso, & ex unaquaque ejus parte præconia

Divinæ

## X 3 X

Divinæ existentiae exhibeant invictissima. Neque hæc omnia; neque singula confutata fuere, quantumvis Physiorhei summo idegerint studio. Cum tamen Spartam hanc nemo Angelico Præceptore D. Thoma Aquinate melius egerit, rationes ab ipso allatas defendemus, atque adversus quoscunque propugnabimus, iis non solum primam causam, primumque existere motorem ostendi, sed Deum. Distinctis ergo Theſibus

3. Existentia Entium contingentium Ens necessarium existere demonstrat, nempe Deum.

4. Existunt Entia cogitantia, existit ergo Ens intelligentissimum.

5. Ens summe necessarium, intelligens, & independens ex motu corporum evincitur.

6. Ex causarum efficientium serie, quæ infinita esse nequit, prima ostenditur causa, nempe Deus.

7. Ex mundi hujus, et rerum omnium ordine, pulchritudine, et harmonia sapientissimi Artificis æterna existentia demonstratur.

## III:

Materiæ, et mundi creatio ex nihilo semper insensos hostes nata est, et hodie plurimos. Quidam materiam, corpora, mundum adspectabilem solis ideis existere, puraque esse phantasmata dixerunt; qui et Philosophiam, et Religionem universam penitus evertunt. Huic medendo malo Materialistæ omnia esse materiam posuerunt, hancque per se existentem, necessariam, increatam, æternamque fateantur oportet. Atque ut aliqua possent ratione rerum omnium originem explicare, motum esse materiæ essentialem pluribus veterum, & recentium Philosophorum detortis principiis, statuere. Sed materia si æterna, et increata, immobilis et quoad totam suam molem, et quoad singulas particulas esse debet, homogenea, et absolute infinita. Summa est enim, et necessaria connexio inter æternum, et infinitum; inter independens, et immutabile. Repugnat ergo rectilineus, et circularis motus. Absurdior vero & altera materialistarum positio, mundum nempe hunc adspectabilem ex cæca materiæ necessitate efformatum fuisse; ita ut totum mundi sistema Mechanismi legibus factum sit. At quo motu, qua dimensione, quibus obliquitatibus, et legibus fieri poterat? Habeant illi prima rerum elementa durissima, et diversæ figuræ, mirabilem habeant elementorum progeniem, intrinse-

cas, activas vires, et attractrices habeant quidem; ex his tamen tantum opus nunquam prodibit. Propterea intimo sensu quilibet homo cognoscit se cogitare, seque liberum esse; sed materiam posse solis mechanicis legibus, vel occultis cogitare haud affirmari potest, cum evidentissime demonstratum sit materiam sive creatam, sive increatam cogitare non posse. Quare tot impia ssystemata præcludimus.

8. Motus, quocumque admissio ssystemate, non est materiæ essentialis.

9. Naturæ motus stare nequit cum æterna existentia.

10. Repugnat materia increata, immobilis, et independens.

11. Veteres Ecclesiæ Patres materiam non esse increatam, et æternam constanter docuerunt.

#### IV.

Sed si materia naturæ suæ necessitate non existit, nec mundus hic adspectabilis Ens erit a se, & increatum. Non ita tamen hoc intelligi volumus, ut celebrem nonnullorum veterum de æterna mundi creatione controversiam ingradiamur. Alia est hæc subtilis questio ex vocabulorum explicatione fortassis tota dirimenda. Sit tamen ita ut Mosaicum Geneseos ssystema unice adoptandum esse contendamus: eo enim omnis rerum æternitas evanescit, incendia, diluvia, bellaque ante datam epocham conficta esse decernuntur. Sinensium antiquissima gesta fabulosa omnino definiuntur, licet directe hæc mundi æternitatem non inferant, sunt tamen Metaphysicæ, et Religioni valde periculosa. Non inde tamen inferat aliquis mundi creationem fide esse tenendam, non ratione demonstrandam. Ast mundi creatio nonne possibilis ostenditur? Nonne omnia producta esse ex nihilo demonstratur? Hæc veteribus Philosophis mutatis vocibus nota omnibus fuerunt. Audacter propterea nimis, et impie hæc super re putant aliqui doctrinam de educatione rerum ex nihilo Philosophis ignoram, primum Christianam Theologiam invenisse, dicentes. Contra de humana ratione nimis alii superbientes modum creationis ex nihilo explicare student. Satiùs sit, qua ratione factum sit ignorare, licet factum esse dicamus. Nemo tamen rerum creationi magis sese opponunt quam Spinozistæ. Hi enim nonnisi unam substantiam infinitis attributis præditam admittunt, quorum duo cogitatio, et extensio infinita sint, et unumquodque æternam, et infinitam essentiam exprimat. Cætera vero necessaria modificationes sint illius substantiæ. Porro

quid

## ( 5 )

quid aliud hæc omnia deferunt, quam purum, putumque materialismum, et Atheismum? Quis autem persuadere sibi possit, nisi ipsissimis oculis suis videret, inveniri aliquos, qui non modo celebriores Philosophos veteres, et cujusque ætatis litteratos viros Atheos fuisse dicant, sed Atheismum, et Spinozismum in sacris Litteris, et a Sanctis Patribus doceri, et tradi comminiscantur?

12. Mundus non est a se æternus, et independens.
13. Nec ab æterno creatus, immo nec a Deo potuit creari.
14. Deus, et mundus non unum sunt.
15. Nec una tantum in mundo substantia.
16. Sacra Scriptura, et ratio humana ostendunt Deum infinite esse diversum a materia, et a mundo.

## V.

Lumen utrumque spernit, expugnat, qui omnium gentium, omniumque populorum consensum non satis validum, immo infirmum in Religionis negotio argumentum esse affirmare non veretur. Nam si sententiam aliquam constanter tenuit omnis retro vetustas, si universæ nationes, omnesque populi, Philosophi, et Principes in eadem conspirant, quid amplius inquirendum, ut naturæ, rationis, divinique Numinis vocem habeamus? Si itaque Dei existentia, si futuræ vitæ perennis status, si Religionis ab omnibus omni tempore, et loco opiniones receptæ inveniuntur, ut his cujusque hominis vita, societas, & leges inædificentur, quibusnam rationibus ostendent Deistæ statum Irreligionis, sine supremi scilicet Numinis cognitione, et metu futuræ vitæ homini esse naturalem, et Atheorum Rempublicam jure optimo stare posse, diuque consistere, superstitionemque esse hominibus, et imperio exitiosorem Atheismo, sibi virtutem, honestatemque constringant naturalem, abstractam, boni operis mercedem, et præmium? Quid si pravorum affectuum tumultu, si passionum motibus agitur? hic aut nullam esse hanc virtutem dicet, aut talem, ut ipsemet non mereatur obsequium. Si indubitati judicis minæ, si Religionis ab omnibus admixtæ metus sæpe franguntur, quidne de abstractæ virtutis præmio? Consensere namque gentes in Deo admittendo, colendoque, in animarum immortalitate, futuræque vitæ statu, consensere in juris naturalis officiis admittendis, et tanti ponderis esse novèrunt, ut nihil magis. Profecto nonnulli, et plerique etiam

viri

viri docti ex pervulgatis certitudinis gradibus, nempe Metaphysica, Physica, et Morali, ut nempe prima certitudo gradum omnem evidentię complectatur, ea minor sit Physica, qua minor itidem Moralis, ad quam consensus omnium gentium referatur, hoc argumenti genus infirmum, et debile esse arbitrantur. At scimus hoc ex arbitrariis placitis, et Critices notionalibus canonibus præscriptum esse: distinctio siquidem triplex non graduum certitudinis significat mensuram, sed principiorum unde demonstrationes habentur diversam naturam, et conditionem, ut quæ inde sequitur certitudo, et argumentum eandem convincendi, et detinendi intellectum vim habeat parem, et gradum. Sed ex diversitate principiorum diversa non oritur certitudo, sed hæc una est in geometricis, ac in moralibus: falsa enim sententia, et dubia infirmitas quædam intellectus est, et nequit esse semper, et in omnibus. Veritas igitur, quæ ex consensu omnium gentium derivatur non potest esse falsa. Hoc principium certitudinis moralis eandem nobis demonstrationem parat apodicticam, ac quodcumque aliud geometrarum axioma, ut propterea eo utrumque nitatur, quod idem non potest simul esse, et non esse. Rem hanc viri acutissimi contra nonnullorum malam morales certitudinis interpretationem, et intelligentiam institutis elucubrationibus nuper ostenderunt: quorum rationibus nos quoque convictos ita fatemur, ut in ipsorum sententiam prorsus descendamus. Præterea hujus nostræ demonstrationis vim non infirmant desperatæ causæ patroni dum omni ætate Atheos fuisse pronunciant, numerantque sectas integras, et Americæ, et Asiæ plures nationes. Atqui de Sinenfibus dum aliqui omnimodam eorum, puramque Religionem infirmis sane, suspectisque testibus laudant, alii purum, putumque Atheismum redolere affirmant. Sed non dubiis argumentis demonstramus Deum cæli, et terræ Dominum coluisse. Parum, immo nihil, proficiunt, qui hoc argumentum vanum dicunt, quod a politicis, et legumlatoribus Dei cognitio invec̃ta sit ad continendos in officio populos, vel ex metu, et terrore Dei opinio invec̃ta sit. Contra hæc omnia statuimus.

17. Consensus omnium gentium pro Religionis negotio firmum, validumque præbet veritatis argumentum.

18. In Deo admittendo, colendoque consensere omnes gentes, populique omnes.

Athei



## X 7 X

## VI.

Athei in defectu peccant nullum admittentes Deum; Gentiles vero, quod plures habeant in excessu. De origine Idolatriæ non una est Eruditorum opinio. Principio certissimum dicimus, homines in uno admittendo Numine; supremoque cæli, et terræ, omniumque Factore consensisse. Deinde plures admisisse: ut propterea vera Religio falsam præcesserit, ut veritas errorem. Quamobrem absurdissima est quorundam recentium opinio, qui volunt Theismum veram unius Dei Religionem esse Polytheismo, et superstitioni posteriorem, quia non est verisimile; ajunt, populos plus sapuisse, cum adhuc barbari, et inculti essent, quam cum exuta barbarie litteris, et artibus vacare visi sunt. Contra quos ratio, et fides clamant, dum veram Religionem non hominum inventum fuisse, sed a Deo primis hominibus veri unius Dei cultus revelatione datam. Jam vero Polytheistæ mundum a pluribus Diis gubernari statuunt: et licet horum error variari possit; et variæ sint gentilismi species; cedunt omnes si unus demonstretur Deus. Naturalibus igitur rationibus unitatem Dei propugnandam suscipimus. Quoniam vero miracula, et prophetiæ veræ Religionis characteres sunt, quid de miraculis, et oraculis Gentilium sentiamus paucis exponendum. Negamus imprimis vera fuisse miracula, vel Dæmonum arte, vel Idolorum virtute; quæ a gentilium Historicis facta esse narrantur. Fuerunt vel ludificationes phantasæ, et sensuum, vel ministrorum fraudes, et artes Dæmonum. Non possumus tamen in eorum descendere sententiam, qui hæc omnia conficta esse ab Historicis arbitrantur? Cæterum id præterire non possumus in tanta scilicet cultorum Numinum copia, unum semper eminentissimum cognitum ubicumque fuisse. Dii quoque majorum gentium admittebantur, inter quos divinus erat rerum omnium imperium; Jupiter cælum, et terram; Neptuneus mare; Pluto tristes inferni regiones regere credebantur: Erat et quasi infinita alia Deorum turba, qui certis negotiis præerant, quibusque proinde multa superstitione preces adhibebantur. Absit tamen, ut Gentilium cultus, et ritus ad Christianos, ut quidam volunt translati dicantur. Quare

19. Polytheismus impiissimus error rejiciendus est.

20. Unicus Deus est, ut sacræ Litteræ, et ratio evidentissime demonstrant.

21. Gen.

21. Gentilium miracula, et oracula ab eorum Diis non prodire.

22. Lieet ab hominum malitia, et cupiditate plura, non tamen omnia.

## VII.

Inter Polytheistas dubitari non potest nonnullos fuisse, qui aded desipuerint, ut divinam naturam corpoream, humanamque sibi confixerint, quorum insaniam simplicitas, et immaterialitas divinæ naturæ necessario demonstrant. Præter quos insanientes homines, alii hac in re reprehendendi sunt, quos Antropomorphitas hæresum historia appellat. Hi Deum habere corpus humanum, et proprio sensu organa sensoria statuunt, ut propterea imaginandi vim habeat, nervos, et cerebrum, manus, et pedes quorum ope quidquid extra se est, agit, certamque spatii partem implet. Atque hæc omnia ex abusu, et mala intelligentia sacrarum scripturarum admissa fuisse dicitur. Nemo autem non videt Antropomorphismum facile in materialismum induci. Hic error in crassum, et subtile dividitur, ut ille corpus, iste affectus humanos in Deo ponat. Utrumque refellimus, tantumque errorem nulla ratione tolerandum esse definimus; dogma quippe Fidei est, et non adiaphora opinio, Deum omnis corporis expertem esse; cujus dogmatis haud oppositum aperte docuere Melito Sardenfis, Audius, Tertullianus, et Epiphanius. Horum dicta in catholicum sensum interpretari possunt: de Audio tamen, a quo Antropomorphitæ, qui et Audiani, dicimus, minus caute loquutum fuisse; hinc enim et apud quosdam Monachos Egypti, in Africa, et in Italia sæculo Ecclesiæ decimo error hic adeo invaluit, ut catholicæ sententiæ defensores, impietatis rei dicerentur, ab Ecclesia, et a mundo exterminandi. Quam opinionem ex rusticitate mentis, et ignorantia ortam fuisse sancti Patres asseruerunt. Non inde tamen Genevensis Philosophi quis adoptet iudicium, et præceptum, parvulos scilicet, et adultos antequam ad vigesimum ætatis annum pervenerint in elementis Christianæ Religionis non esse instituendos, cum quæcumque ipsis de Deo addiscenda exhibentur, ab iisdem nonnisi corporeis imaginibus repræsententur, ac in Antropomorphismum crassa ignorantia dilabantur; hinc enim Antropomorphitas innumeros apud Christianos colligit impiissime laudatus Auctor. Quamobrem

23. Antropomorphismus dummodo verus; et realis error sit, refellendus est.

24. Christianæ Religionis dogma est, Deum esse incorporeum.

25. Deum simplicissimum, omnisque compositionis expertem et Revelatio, et Philosophia demonstrant.

26. Inter ejusdem attributa distinctio realis quocumque sensu admittatur, divinæ opponitur simplicitati.

27. Ab omni erroris impacta labe Melito, Tertullianus, Epiphanius defendi possunt.

## VIII.

Infinitum esse Deum, summæ; et absolutæ perfectionis, scilicet infinitæ potentæ, unde omnipotens, infinitæ scientiæ, unde omniscius, et infinitæ bonitatis, unde optimus, non fide tantum credimus, sed luculentissima ratione demonstramus. Contra utramque errant, qui asserere non verentur Deum tantum infinitum esse, quia ejus fines non comprehendimus, ut propterea non aliquid in re significemus, sed inpotentiam tantum nostram in animo fines illius rei non assequi, confitemur; neque enim ulla est infinitatis idea, conceptus, phantasma ullum. Relativam ergo infiniti ideam habemus, et Deum honoris gratia infinitum nominamus. Quibus verbis quis non vider divinam naturam penitus tolli, Deus enim infinitus absolute est, omni principio, et fine carens, infinitis perfectionibus cumulatus. Hinc etiam æternus, et immensus, quippe qui et respectu temporis, et respectu loci infinitus sit. Non ita tamen æternum dicimus, ut ejus ideam concipere valeamus. Si enim est tota simul, et perfecta interminabilis vitæ possessio, ignotam rem per ignotiorem non explicamus, seu idem per idem; sed incomprehensibilis Entis rationem adæquatam non damus, sed aliquo modo explicamus, quin ad æternam temporis successivam durationem nos conferamus, et novum enigma edamus; in quolibet enim successionis instanti infiniti Entis limites signare quisque potest, prius et posterius, majus, et minus, et dicetur Deus modo plures annos, vel sæcula vixisse, quam quando mundum creavit. Porro dum Divinitatis incomprehensibilia mysteria nova quadam explicationis via intelligere quis audet, in maximos prolabi errores sæpe vidimus. Cum igitur Deum esse æternum defendimus, id sine ulla prorsus successione confitemur. Deus enim ex hoc immutabilis est; cum sit æternus, necessitate naturæ exi-

sit,

fit, et est a se; ergo immutabilis, sed est et liberrimus; et sua stat libertas optimo jure cum immutabilitate. Infinitus tandem Deus est respectu loci, et dicitur immensus, et non sapientia, et potentia tantum, sed et substantia sua, et essentia. Ubique locorum existit modo quidem nobis impervio; temeritatis propterea accusandi sunt illi, qui naturali ratione explicare hunc aggressi sunt, per formalem nempe extensionem, quam nihil aliud esse nisi spatium inde exponunt: spatium quippe ens reale, absolutum, infinitum, increatum; immo Entis perfectissimi proprietatem, ipsumque Deum esse pronunciant. Hanc æternam, realemque extensionem Christiana Theologia rejicit omnino, sicut ens quodlibet infinitum, æternum, et immensum extra Deum. Quidquid enim existit formali præditum extensione ab aliqua causa productum esse, nisi Spinozismus admittatur, sancte, firmiterque tenendum est. Igitur

28. Deus infinitus est, non honoris causa, sed quia absolute omni fine caret, infinitisque perfectionibus præditus est.

29. Æternus quoque confitendus Deus, non successiva, sed simultanea duratione.

30. Immensus omnino sapientia, potentia, et substantia ubique præsens.

31. Liberrimus, et tamen immutabilis.

32. Hæc autem omnia nec mundano spatio, nec ulli rei præter Deum tribui posse Religio Christiana decernit.

## IX.

Quamvis plerique, qui Deum providentissimum esse negant, id agant, ut liberius vivant, pravisque animi, et corporis motibus indulgeant, libertinorum propterea impium, laudatumque principium sit; Deum ludere in orbe terrarum, nec nostra considerare: alii tamen infirmo rationis lumine ducti, licet Deum aliquibus providere fateantur, rebus omnibus tamen negant, contingentibus nempe, et libris, sublunaribus, et individuis. Plura enim occurrunt, quæ si providus Deus est, explicari nequeunt, captumque superant humanum. Quod etiam si concedatur, non inde negari debet providentia, quæ tot rationum momentis demonstratur in Deo, qui si non providentissimus est, Deus non est. Qui ergo providentiam negant, fortunæ, et casui omnia adscribant. Porro cum providentia sit ratio

ordinans

ordinans res in finem, et hujus ordinis executio: utrumque demonstrandum est. Jam vero si est ratio, ordinis rerum in finem scientiam rerum omnium habeat Deus necesse est, quin rerum omnium contingentium, et humanæ libertatis naturæ quidquam auferat: immo scientia Dei futurorum omnium causa est. Quæcumque ergo futura, non ideo novit Deus, quia futura sunt, sed ideo futura sunt quia novit Deus. Ordinis vero executio, quod est alterum providentiæ caput; ita ordinatissime a Deo fit, ut nulla vel minima res vigilem, et operosum Deum fugere valeat, nec ipse unquam providens vilibus rebus, et minimis a majestate sua cadit. Hinc omnium ingratisimi haberi debent, qui divinam providentiam non agnoscunt, dum omnibus ab ipsa bonis largissime cumulantur. Sunt tamen alii, et fuere, qui cum viderent mala plura in mundo esse, et peccata non tolli, divinam denegarunt providentiam. Implexa sane hæc videtur de malorum origine inquisitio, num scilicet Deus bonus, justus, misericors, omnipotens, et sanctus unus cum sit bona cuncta creet, et inducat. Antiquissimus error est Dualistarum ab Orientali philosophia derivatus, qui Deum summum bonum, et Deum summum malum admittit, ille omnium bonorum, hic malorum causa. Si enim nihil sine causa fit, et bonum causa mali esse non possit, necesse est, quod in natura, ut boni, ita etiam mali summum principium existat. Secundo Ecclesiæ sæculo hanc Gentilium opinionem adoptarunt hæretici quidam Cerdoniani dicti, quos postea secuti sunt Marcion, et Apelles, hos vero Manichæi, qui falsum de duobus Diis, absurdissimumque dogma longe, lateque vulgarunt. Hi deinde variis nominibus reviviscere visi sunt, et sæculo decimo tertio Albigeneses apud Gallos, Patareni, et Cathari apud Italos vocati sunt, ad quos refellendos plures viri docti lucubrationes suas nobis reliquerunt, ad eosque procul repellendos Inquisitionis Tribunal Imperialibus sanctionibus primum, dein Romanorum Pontificum, et Ecclesiæ decretis institutum fuit, pluresque Ordines Religiosos, et Militares Italarum pietas vidit, alluit, et fovit, illorumque monumenta plura restant adhuc præslara. Hinc recentes quidam refutantur, qui scribere non erubescunt, ut infamiam Inquisitionis Officio creent, sæculis decimotertio, et decimo quarto nullam in Italia extitisse hæresim, hæreticos nullos, quos sic dictos fuisse asserunt partium studio actos, qui Ghibellini erant a Guelphis. Atque hæc dicimus, ut Incredulos nihil novi hac de re prodire quique videat: Argumenta plura exornant, quæ veterum sunt deliria,

ut ostendant mala physica, et moralia a Deo bono esse non posse: Quod si mala hæc plura sunt, Deus malus existit, Deique perfectissimi nulla providentia. Sunt qui data opera magnis voluminibus hæc argumenta exornant, et prosequuntur; sed frustra laborant: dum enim Deum providentissimum aperimus, unicum defendimus, et malorum causam assignamus. Mala physica ad totius universi perfectionem spectant, et bonum sunt; Moralia vero mala nonnisi ordinis et rectitudinis privatio cum sint, defectibilem creatam voluntatem causam habent. Quamobrem

33. Deus omniscius est, quin humanam lædat libertatem.

34. Providentissimus quoque Deus est, et de omnibus maximis et minimis curam habet.

35. Mala quæ sunt in mundo stare possunt cum divina providentia.

36. Nec duo admittenda sunt æterna principia bonum, et malum, hoc enim divinæ unitati, non minus providentiæ, et bonitati opponitur.

37. Non est Deus auctor peccati, licet et certo cognoscat, et permissivo velit decreto.

## X.

Jam verò cum Deus infinitis perfectionibus cumulatus sit, atque generali providentia omnia regat, atque administret, specialique cura rationales creaturas, et liberas, nempe homines, quas ad altiore, perfectioremque finem dirigit, scilicet ad Deum ipsum cognoscendum; ad hunc autem finem eos Religio ducat; homines debito honore colere Deum, et amare tenentur; igitur vera Religio hominem docere debet, quid credendum, quid sperandum, quidve amandum sit. Atqui hæc omnia nonnisi duplici interno, externoque cultu perfici possunt; utroque igitur tenetur homo. Internus quippe cultus in mentis devotione, et cordis affectibus sistit, alter vero orationibus, sacrificiis, piis quibusdam cæremoniis perficitur. Rigidiore Deistæ utrumque negant, eo quod Deus obsequiis nostris non indigeat: mitiores vero vel interiorem negant externum præcipientes, hypocritismum, seu Pharisæismum impie commendantes; vel interiorem unice quærunt, et exteriorem, uti superstitionum omnino exprobrant, et calumiantur. Primum Politicis, alterum Libertinis

acceptissimum. Novissimi vero juris naturalis Tractatores oppido falluntur, dum utrumque cultum ab hominum naturalibus officiis erga Deum saltem directe exulandum præcipiunt. Quamvis tamen vel ipso rationis lumine cognoscamus Deum interno externoque cultu esse colendum: qui vero, qualisque esse debeat aliunde cognosci, et detegi debet. Non ratio humana, non natura, sed revelatio hominibus facta cultum Deo debitum determinare tantum potest. Principis est decernere quo a subditis obsequio ipse colendus sit: si enim unusquisque hoc decernere posset, cum homines varii in cogitando, et agendo sint, varius quoque, nec uniformis cultus haberetur. Quilibet pro ingenio suo sibi Numen effingeret, et pro criminibus etiam alterum advocaret. Non hic memorabo quot sacrificiorum monstra ex hac cultus libertate gentiles etiam cultiores supremo Numini litare consueverant: satis sit nominare Baccantium deliria, Orphica mysteria, item Eleusinia a veteribus descripta: humanas hostias, absurdissimos cultus, Florales ludos, in quibus non aves, non quadrupedes, non denique sanguis humanus, sed multo scelestius pudor ipse Diis offerebatur. Ad revelationem itaque recurrendum est, ut tuto sciamus interno cultu colendum Deum, tanquam primum omnium principium, et ad ipsum omnia, tanquam ad ultimum finem referenda, quo Deum super omnia diligamus, nosmetipsos propter Deum, aliosque in Deo, quo ipsum oremus, uti omnium bonorum largitorem, precibusque Deo dignis honoremus, gratiasque ipsi agendo. Externo vero cultu ab ipsamet revelatione præscripto Deus ipso colendus, quo publicæ preces psalmis, et hymnis condecoratæ, quo sacræ cæremoniæ, altaria, templa, vestes, ornatus, imagines, simulacra, Sanctorum exuvie, quin ulla superstitionis labes inuratur præscribantur, ut propterea reprehendendi quam maxime sint Deistæ, et Novatores dum apud Catholicos omnia in cultu externo fæda superstitione maculata esse impie clamant, et conqueruntur. Omnibus enim his externis præscriptis rebus, et modis si exuatur Religio quid amplius remanebit, quo cultus externi utilitas, et sanctitas, immo ipsamet Religio demonstrantur? Quare

38. Naturalis ratio ostendit interno cultu colendum esse Deum.

39. Externo quoque cultu sensibus omnibus, et corpore esse adorandum docet.

40. Rationi naturali sese opponunt Politici, et Libertini, dum illi internum, isti externum rejiciunt, et exprobrant.

41. Quo-

41. Quoniam cultu interno Deus colendus sit revelata Religio demonstrat.

42. Cultum quoque externum Deo debitum sola revelatio definire valet.

43. Orandus Deus ab hominibus necessario est, hymnis et psalmis laudandus.

44. Exteriores cæremoniæ, altaria, templa, vestes, et ornatus, imagines, et simulacra religioso cultu ordinari possunt.

45. Nulla est ergo in Religione Christiana in exteriori cultu superstitio.

## XI.

Revelationis profecto lumine indiget homo ad ea quoque, quæ juris naturalis, et gentium principia, atque officia spectant. Nullum est in universa Theologia tam certum, et firmum, atque experientia demonstratum, quam vires hominis post Adæ lapsum debiles, et infirmas devenisse, ut ad perfectam ipsiusmet legis naturalis cognitionem sola hominis ratio pertingere nequeat. Sed nulla veritas, ut isthæ tam acerrimo, hostes nata est. Eam non modo explodunt Deistæ, qui omnem revelationem de medio tollere conantur, sed aliqui etiam juris naturalis Tractatores, qui tametsi agnoscant necessitatem Religionis supernaturalis, contendunt tamen, naturam hominis satis esse, ut omnia officia, quæ a lege naturali dependent, possint a quolibet non obtuso, inertique homine perfecte cognosci. Vel inter Catholicos nostra hac ætate plures nobilissimi ingenii Viri utramque paginam implent, quæstionem hanc maximo partium studio versantes, atque eo devenere, ut cum Heterodoxis de statu præsenri humanæ naturæ sentirent, hominemque facerent, et haberent, ut ipsis esset in optatis. Philosophos se agere, non Theologos clamant, ut revelati luminis necessitas ad Theologiam, non ad Philosophiam statuenda, cum unus, idemque homo sit, una, eademque ratio debilis, et infirma Philosophi, et Theologi. Quid ipsi Gentiles sola ratione docuere? permulta recte præcepta nobis dederunt, vix tamen, ac ne vix quidem omnes vitare potuerunt errores. Nullus eorum rerum creationem, veramque hominis originem perspectam habuit. mundum ab æterno extitisse, vel fortuito coaluisse somniabant: duo esse summa principia; fato omnia regi, mortales animos esse dogmatizarunt. Suicidium, fornicationem ebrietatem, communitatem sæ-

minarum



minarum, crudelem liberorum expositionem laudarunt; immo mendacium, perjurium, vindictam sæpe numero præcepere, ut de his merito concludi possit, neminem ægrotum quidquam somniare tam infandum, quod non aliquis dicat Philosophus; ut propterea falsam eorum sapientiam quis vocaverit, et in omni pene questione errasse alius scripserit, opusque veteris auctoris extet, quod *Irrisio Philosophorum* appelletur. Sola ergo divina revelatio legis naturalis præcepta, et dogmata sine ullo prorsus errore tradidit, Evangelium continet, et Sancti Patres constanter docent. Longum nimis esset de recentium Naturalistarum erroribus dicere. Principium juris naturæ collocant aliqui vel in unicujusque utilitate, in propriæ vitæ conservatione alii, in quodam animali appetitu, in socialitate, in ordine naturæ, in essentia hominis, in amore; ut propterea vel putum, putumque Epicureismum, vel merum Stoicismum doceant; unus alium corrigit, emendat, redarguit, rejicit, explodit. Mendacium, fœnora, polygamiæ, suicidium, monomachiam, et dissolubile conjugium docent. Jam vero si seposita revelatione solo naturali lumine omnibus numeris absoluta lex, vel jus naturæ haberi posset, profecto habuissent philosophi, qui maximo ingenio præditi omnem navarunt operam, ut id assequerentur. Si igitur tot sæculorum experientia contrariarum evincitur, vera hæc erunt.

46. Ad legis naturalis perfectam cognitionem necessaria est divina revelatio.

47. Juris naturalis, et gentium disciplina non sine piaculo solo rationis lumine tractari potest.

48. Iusti, et recti officia ex libris Gentilium, et recentium Naturalistarum operibus addiscenda tuto non sunt.

49. Christianæ Religionis Moralis Doctrina sanctæ, et ex integro in sacris Litteris, et in sanctorum Patrum scriptis inquirenda est.

50. Sine revelationis, et Gratiae auxilio nemo Gentilium æternam felicitatem consecutus est, et consequetur.

## XII.

Sicut Gentilium fuerunt aliqui Christianos fieri nolentes, quia putabant ad salutem sufficere æternam, si bene, et honeste vivant, supervacaneum quod etiam crederent, quæ non intelligerent: naturalistæ moderni toti sunt, ut omnem veritatum supernaturalium reve-

lationem

lationem rejiciant, solamque legis naturalis observantiam necessariam esse contendunt. Porro non bene vivit, qui Deo non credit; sicut enim concupiscentiæ oculorum lex, et justitia, concupiscentiæ carnis penitentia, et mortificatio; ita superbiæ mentis submissio, et captivitas intellectus unice reponenda sunt: sed hæc non alia, quam quæ divinæ auctoritati mentem submittit. Credendum ergo est, quod divina revelatione constet, et primo internæ hominis corruptionis originem, causamque nonnisi ex homine ipso esse repetendam, et tanti mali remedium nonnisi ex divinæ pietatis, et sapientiæ arcano. Profecto tantam hominis corruptionem naturalem, vel ex Deo esse quis potest affirmare? supernaturalis itaque est, quod vel ipsi Philosophi, et Cicero ipse agnovere; quænam autem divina potest revelatio solum aperire: hæc autem primi hominis culpam causam esse, et originem docet; Incarnationem vero Divini Verbi remedium. Ex his duobus universa lex pendet, et prophetæ, totius mundi historia, humani generis per tot sæculorum myriades vicissitudines, Imperiorum, bellorumque, cladum, et omnis lacrymabilis fati series pendet, Judaicæ gentis ritus, et cæremoniæ, leges, et religio, Idolatriæ monstra, et densissimæ tenebræ, humani intellectus, et voluntatis, viriumque omnium debilitatio, vetus, et novum Testamentum, gratia, et gloria, virtus, et vitium pendet. Quamobrem vires omnes insumunt Increduli Pelagianorum vestigia sectantes, ut persuadeant intestinum hominis bellum, cæterasque infirmitates nullius corruptionis indicium esse, aut effectum, sed illi, ut est habere partes corruptioni, et dissolutioni obnoxias, prorsus naturale. Sed et si hoc possibile attenta humana natura concedatur, qua poterit esse ratione divina inspecta providentia? Nec eadem est corporis, et animæ conditio. Quidquod hæc intestina discordia non est adeo necessaria, ut sine illa homo creari, esse, aut concipi non possit? Quamobrem quis æquo animo Deistarum ferat audaciam, dum universam de primævi hominis lapsu Mosaicam narrationem innumeris contradictionibus, Æsopianis fabulis, mythologicis, et methaphoricis scatere affirmant? Eos præverant Pelagiani quinto Ecclesiæ sæculo, qui tot turbas in Ecclesia excitarunt, damnatique fuerunt. De serpentis natura, loquela, et artibus, de fructus veriti vaga, incognitaque, infelici arbore, deque aliis insignibus scientiæ boni, et mali, et vitæ arboribus, deque aliis innumeris, quæ originalis culpæ historiam consectantur non breves opponunt audacissimi animadversiones. Sed hi nodos quærunt ubi scirpus est. In hoc corrupto naturæ statu violatis per peccatum æ-

ternis

ternis legibus Deum graviter offendit homo, iratumque sibi vindicem Deum reddit. Qui ergo fieri potest, ut sola naturali ratione sufficiens medium Deum placandi adinveniri queat? Omnia, quæ ad id hæctenus excogitarunt Deistæ, inepta prorsus videntur. Etenim qui ita Deum constituunt, ut ratione bonitatis suæ debeat, aut saltem jure absoluti dominii reum absolvere possit, quin tamen aliquam ab eo pœnitentiæ, et satisfactionis conditionem exigat, nonne infinitam, et intolerandam peccatis licentiam concedunt? nonne divinæ sanctitatis, sapientiæ, et providentiæ æternas leges funditus tollunt? Sed nec est cur ad ipsam pœnitentiam confugiant, quæ non ita per se est comparata, ut certam remissionis, et gratiæ spem peccatorum animo ingerat. Quærendum enim adhuc est, num Deus eam acceptare velit, et quidem semper, ac ipse reus peccat, quod frustra quis religione naturali sciscitabitur. Postremum super est Deistis effugium, videlicet, sacrificiorum vis, atque efficacia. Verum etsi non ignoremus auctores magni nominis ex veteribus æque, ac recentioribus statuisse non a speciali, et expresso Dei mandato, sed ab ipsa conscientia, et natura hominibus sacrificandi religionem dictatam, attamen et sanior ratio, et scriptura clare manifestant sacrificia per se Deo haud placere posse, nec quidquam ei voluptatis asserre. Accedit præterea, quod sciendum adhuc sit quid sacrificandum, et quomodo sacrificandum esset, quod ipsa ratio non dicit. Neque quæ ad cultum religionis, et Sacramentorum pertinet ex hominum arbitrio pendent, sed ex solius Dei decretis. Igitur cum ratio nostra sibi relicta nullam tutam ad salutem viam, et divinæ gratiæ reconciliationem investigare, et invenire queat, desperandum nobis esset, nisi alio medio extra naturæ ordinem divinitus revelato in certam spem erigeremur. Quod sane medium ipsa veritate compulsi aliquando agnoverunt iidemmet Deistarum patroni. Ex his itaque statutis sequentes disputationi damus

§1. Extat in homine interna corruptio, et perduelle bellum homini ipsi prorsus non naturale.

§2. Hujus corruptionis causa, et remedium non ratione, sed supernaturali revelatione cognoscuntur.

§3. Medii quoque Deum offensum placandi notitia ab ipsamet tantum hauriri potest revelatione.

§4. Absque ulla conditione non potest Deus jure absoluti Dominii reo veniam impartiri, nec ratione suæ misericordiæ.

§5. Pecca-

§5. Peccatoris voluntaria pœnitentia non est expectanda, sed juxta expiationem, et satisfactionem sancita speranda remissio.

### XIII.

Possibilitatem, et necessitatem divinæ revelationis ad veritates naturales, et supernaturales cognoscendas hæcenus demonstravimus: superest nunc ut ejusdem possibilitatem, et necessitatem in mysteriis, quæ eaptum mentis nostræ superant, ostendamus. Invisum, immaniterque molestum Deistis est mysterii nomen a religione prorsus eliminandum; nullum non movent lapidem, ut persuadeant religionem omnis mysterii expertem esse debere. Mysterium propterea omne de medio tollere nituntur, clamant illud contra rationem esse, quia quod secundum rationem non est, rationi dissonum esse debet, hoc est contra rationem. Mero hocce sophismate gloriantur quamplurimum; sed cum inter ea, quæ sunt secundum rationem, et ea quæ sunt contra rationem ea admitti debeant, quæ sunt supra rationem, illud plene solutum manet. Frustra humanam rationem totius Religionis, et veritatis mensuram dicunt, cum omnis Religio Deum, in quo infinita sunt mysteria, et ipse mysterium absconditum sit, respiciat. Reponunt religionem hominis viribus accomodatam esse debere doctis, indoctisque æquo jure congruere: talis ea non est, in qua mysteria, ænigmata inexplicabilia inveniuntur. Sed nihil magis a veritate alienum: religio enim vera proponere debet, quæ Dei essentiam, attributa, voluntatem, decreta, atque operationes spectant; hæc autem omnia, cum infinita sint, infinite exiguum, debilemque rationis nostræ mensuram excedant oportet. Sane mysteria nobis apparent non ut sunt in se sed, ut a nobis ferri possunt, exhibent aliquid, quod principiis rationis non apprime congruit. At si ea, ut in se sunt, nobis intueri liceret, principiis per se notis apprime congruerent. Sunt itaque necessario incomprehensibilia, et obscurissima, non tamen impossibilia: quid namque obscurius infinitate, divinæ naturæ, infinitisque Dei perfectionibus quid incomprehensibilius? Hinc Sanctissimæ Trinitatis mysterium, divinæ Incarnationis, scientiæ, et voluntatis, prædestinationis, et gratiæ arcana, quæ si talia non forent, Deo digna non essent: hinc Sacramentorum vis, et efficacia, veritas, et excellentia. In natura quoque, et in Philosophia obscurissima plura, et incomprehensibilia, non tamen impossibilia occurrunt. Quamobrem summus Matheos Professor, Vir usquequaque clarissimus, et pi-

us Concivis noster Comes Jacobus Riccati, quem honoris gratia nominamus, in geometria, et universa Mathesi hæc omnia una æque haberi ostendit. Ex quo, inquit, recentiores Geometræ uti cæperunt quantitativis relative infinitis, atque infinitesimis, convicti sunt, quod ipsarum respectu non verificantur axiomata nonnulla, quæ in magnitudinibus finitis certissima sunt, neque exceptionem admittunt. Immo tritum illud axioma: *Totum esse sua parte majus*, sæpe locum non habet in illa magnitudinum specie, quæ cum sint maximæ, vel minimæ, sunt relative incomparabiles. Sequens etiam axioma: *Si ab æqualibus æqualia demas, ea quæ remanent, sunt æqualia*, locum non habet, quando regredimur, et procedimus ab infinito ad finitum. Insuper: veritates ipsæ Mathematicæ, ut pariter observat in Epistola ad Maupertuisium, nonne nobis repræsentant aspectus, qui scandalum pariunt, et sub quibus falsæ videntur iis omnibus, qui sufficienter geometræ non sunt? Quis est, qui primo intuitu id omne non rejiciat, quod ipsi enarratur de incommensurabilibus? quod nempe dantur quantitates, quæ divisæ in partes, quantumvis parvas, attamen partes unius nunquam possunt alterius partes metiri: quod linearum nonnullæ semper ad se ipsas accedentes, nunquam tamen copulantur: quod series inveniuntur infinitæ numerorum, quarum termini omnes simul conjuncti non efformant nisi finitam summam. Et tamen mysteria ista necessario consequuntur ex natura extensionis, cujus idea simplicior est, et clarior iis omnibus, quæ ad humanum spiritum attinent. Quæ cum ita sint, quis erit, qui comparare audeat prima Matheseos axiomata cum Christianæ Religionis mysteriis: ut inde deducatur impossibilitas? Et si hisce non obstantibus mysteriis Mathematicis, nullum in ipsa Mathesi impossibilitatis periculum oritur, quo timendum erit ex parte Religionis? Jam vero necessario mysteria in vera Religione admittenda sunt: tunc enim solum vere Deum cognoscimus, quando ipsum esse credimus supra omne id, quod ab homine de Deo cogitari potest, cum naturalem hominis cognitionem infinite divina natura excedat. Per hoc ergo, quod homini de Deo aliqua proponuntur, quæ rationem superant, firmatur in homine opinio, quod Deus sit aliquid supra id, quod cogitari potest; sed si omnia, quæ de Deo proponuntur, ab homine omni ex parte intelligerentur, et comprehenderentur, vel Deus infirmam hominis, limitatamque naturam haberet, vel homo infinitam Dei excellentiam æquaret. Utrumque autem indignum, et improbandum. Absit vero, quod hinc aliam dicamus veritatem Fidei, et Revelationis, et aliam Philosophiæ, et Rationis, et

de una,

de una, eademque re duæ dari possint simul veritates una Fidei, altera Rationis. Hoc damnatum paradoxum renovant Deistæ, quod tamen ipsius rationis principiis falsissimum ostenditur. Quod enim humanæ rationi contrarium est, est quoque divinæ contrarium. Nam utriusque principia eandem respiciunt veritatem. Non est ergo divortium Fidem inter, et Rationem admittendum, multoque minus pugna adest ulla inter utramque, alias Religionis Christianæ dogmata in purum, putumque convertenda sunt scepticismum. Ex quibus hæc sequuntur

56. Potest Deus nobis naturæ suæ arcana revelare, et credenda proponere:

57. Hæc sunt mysteria necessario in Revelatione contenta.

58. Absit tamen, quod hæc sint contra Rationem, licet supra Rationem admittantur.

59. Mysteria revelata non sunt puræ voces, purique soni, sed veritates sunt, quæ maximam habent vim ad mores hominum informandos.

60. Duo contradictoria, quorum alterum Rationis sit, alterum Revelationis, ambo vera esse non possunt.

#### XIV.

Quibus notis vera a falsa Revelatione distinguatur, sciscitantur Deistæ, qui perpetuo nobis objurgant, et opponunt falsas Revelationes. Jam enim, ajunt, revelatæ Religionis sistemate admissio, fanaticorum quilibet suas venditabit visiones; immo quisque in positiva Religione, in qua natus est, obstinato manebit. Sed frustra: certum ad veram ab hominum illusionibus, et fraudibus internoscendam Revelationem Criterium habemus, et quidem evidentissimum: Miracula nempe, et Prophetias, ut nihil modo de doctrinæ sanctitate, et sublimitate dicamus. Miraculum, cum non aliud sit, nisi opus, quod sit præter ordinem totius naturæ creatæ, a solo Deo auctore naturæ procedere potest. Ab hac D. Thomæ Aquinatis definitione distant illæ, quibus miraculum opus definitur mirum ab aliquo Ente intelligente, hominique superiore patratum contra ordinarium, constantem, et uniformem causarum secundarum cursum, vel quod opus sit sensibile a nobis spectatum quasi divinum, nostrisque viribus superius. His definitionibus miracula etiam ab Angelis, et a Dæmonibus

fieri

fieri possent, nec ullam amplius haberent confirmandæ veritatis efficaciam. In idipsum recidit et illa, qua miraculum effectus dicitur rarus, et stupendus ex incognita, sed naturali legum generalium harmonia, et temperatione profuens. Quæ definitio excogitata fuit, ut possibile miraculum adstrueretur, dum vim adimit, et efficaciam. Dei omnipotentia, et veracitas sibi met contradicere nunquam possunt: ergo si quod opus a divina omnipotentia sit, fieri non illud potest nisi in veræ doctrinæ testimonium; ac propterea certa divinæ revelationis nota. Nullum non movent lapidem Deistæ, ut hujus argumenti vim eludant; universæ Physicæ phænomena, præsertim Electricismi in medium adducunt, leges naturæ ignotas exaggerant, Dæmonum præstigia, hominum ludificationes advocant, immo Polytheistarum falsissima miracula opponunt. Sed hæc omnia talia non esse ut vel minimum thesım nostram infirmant, vel ex eo pater, quod naturæ mirabilis quicumque effectus et Dæmonum arte, et hominum fraude patratu distabit semper, et æternum distat a miraculo vero, quod proponimus. De vi prophetica id ipsum pronunciamus. Futura certo, et infallibiter scire, et prædicere non potest nisi Deus; si ergo homines aliqui futura certo nuntiarent, Deus locutus est in eis. Non solum Increduli hanc divinæ revelationis notam explodere nituntur, sed inter Christianos inventi sunt aliqui, aut nullam, aut exiguam prophetiis vim inesse docentes ad probandam Religionis Christianæ veritatem; omnium pessimi Sociniani prophetias abstulerunt omnino, certam futurorum contingentium præscientiam Deo denegantes. Sunt ergo Prophetæ delirantes homines vivida imaginatione, et fervida acti phantasia, fraudolenti Circulatores, qui cum multa prædicere soleant, casu nonnumquam in veritatem collimant, et veluti Astrologi judicarii, qui dum aliis monstrant viam, sibi semitam ignorant. Tandem prophetias typice, allegorice, ænigmatice sensum suum præferre, qui nec naturalis sit, nec certis regulis determinari possit, audacter alii pronunciant. Quare concludere non verentur prophetias ejusdem naturæ esse, ac Gentilium Oracula, ut vel utraque incerta, et fallacia, vel utraque vera, et divina. Singula hæc falsa, et iniqua sunt. Propheta siquidem, licet in Scripturis latius patere soleat, attamen propria significatione eum virum Dei notare intelligimus, qui arcana divinæ voluntatis de rebus futuris, sive etiam præteritis, et præsentibus sola revelatione didicit. Spiritus, quo affati erant veri Prophetæ, Sanctus Dei Spiritus fuit, ut non propria, sed divina volun-

tate

tate locuti intelligantur; et quæ hoc modo patefacta eis fuerant folius divinæ sapientiæ propria, et superhumanæ intelligentiæ vires longe posita, perspicue in Scripturis asseruntur. Quibus testimoniis quid certius, et validius, ad indigitandam et comprobandam immediatam divinam Vatum revelationem? Quamobrem non satis mirari possumus manifestam audaciam, et impietatem prophanorum hominum, qui ut omnem divinam revelationem de medio tollant, pertinaciter negant, Veteris, Novique Testamenti Vatribus mentem divinam unquam extraordinario modo fuisse revelatam. Quamobrem Regium Psalter, aliosque Biblicos vates nonnisi excellenti Hæbraicarum Musarum genio præstitisse venditant. Quare

61. Miraculum illud tantum dicimus, quod effectum præter ordinem totius creatæ naturæ significat.

62. Miraculum sic sumptum, considerato quocumque rerum immutabili ordine, possibile est.

63. Nec ab homine, nec a Dæmone, nec ab ulla creata vi, ut a causa efficiente prodire potest.

64. Homines improbi, et mali instrumentalis causa miraculorum esse possunt.

65. Non tamen in confirmationem erroris.

66. Miraculum ergo proprie dictum a solo Deo hauriri potest.

67. Vera miracula habita modi, et usus ratione a falsis certo distingui possunt.

68. Miracula sunt veræ notæ divinæ revelationis.

69. Prophetia earum rerum est, quæ humanæ phantasiæ et intelligentiæ vires excedunt.

70. Prophetia sic strictæ, propriæque sumpta possibilis est.

71. Hujus donum non solum sapientibus, sed et rudibus a Deo confertur.

72. Et quidem influxu, et commercio veri Dei Spiritus ab humano omnino distincti.

73. Vis prophetica divinam demonstrant revelationem.

74. Religio ergo Miraculis, et Prophetiis firmata non potest non esse vera, et divina.



# THEOLOGICARUM EXERCITATIONUM

## PARS SECUNDA

### DE DIVINÆ REVELATIONIS EXISTENTIA.

#### I.



Taque cum ratio naturalis homini lapsa erigendo in hoc corrupto naturæ statu non sufficeret, Deus, qua est bonitate humani generis misertus, quosdam inter homines elegit, quibus multifariam, multisque modis per extraordinariam revelationem se, suæque consilia patefaciens, mediis omnibus nobis abunde providit, quibus cum vere cognoscere, sincere amare, recte colere, et in suam gratiam, atque amicitiam redire possimus; postremo immortalitatem assequamur. Qui hoc divinum habuerunt commercium nuncupati sunt homines a Deo inspirari, scilicet per somnium, vel visionem, per voces, vel figuras. Jam vero omnes revelationes immediate a Deo factæ ad duo tempora referuntur, ad vetus nempe Testamentum in Prophetis, et novum in Christo. Hæc autem veteris Testamenti revelationem inter, et novi distinctio est: quod illa ad quatuor veluti temporum epochas reduci potest, hæc ad unam tota quanta est facta fuit Apostolis, aut per Jesum Christum Salvatorem, et Magistrum nostrum, aut per Spiritum Sanctum ab eo missum. Apostoli autem eandem reliquerunt Ecclesiæ partim in sacris Litteris novi Testamenti, et partim etiam orali traditione, ut nulla proinde in Ecclesia admittenda sit nova revelatio post perfectum, obsignatumque ab Apostolis Librorum sanctorum Canonem; nullæ amplius Ecclesiæ affulgeant Dogmaticæ Prophetiæ, ut propterea, quæ fidei, et morum sunt dogmata, et præcepta ex solis sacris Pandectis, et Apostolica Traditione ope Hermeneuticarum legum, et sacræ Exegesis investigari, et depromi debeant. Primo Librorum veteris Testamenti genuinitatem, authenticam, et divinitatem demon-

strandam

strandam suscipimus, et ab Deistarum telo viribus totis vindicamus. Moysen omnium Scriptorum antiquissimum, Philosophum omnibus numeris absolutum, Legislatorem præstantissimum, Virum virtutibus omnibus perpolitum, ac Dei gratia maxime ornatum, gesta ab ipso met in conspectu totius Israeliticæ gentis, totiusque Egypti peracta ostendunt, miracula innumera, et Prophetiæ, ita ut aliquorum veterum, et recentium Eruditorum opinio sit, apud Hebræam gentem Apotheosis quadam maximo honoris cultu habitum fuisse, sed apud exterarum nationes, et Idololatrias, præsertim cultiores, ut plura ex Moyse delibarent, quibus eorumdem sapientiam, Cosmogoniam, et Religionem construxere, ac Numina majora, Heroas insigniores in Moyse representaverint. Ignorantiæ ergo, et plagii reum esse recentissimum Deistam dicimus, dum ex fabulis quibusdam et ex Gentilium Mythologia consistam Moyse personam, totamque ejus historiam fuisse audacter nimis pronunciat, cum e contra pluribus demonstratum habeamus argumentis ex Moyse authenticis, et divinis Libris Gentilium fabulas fuisse efformatas. Sed quod maxime tantum Virum Dei extollunt sunt miracula ab ipso met patrata, et prophetiæ. Utrumque digito Dei omnipotentis operatus est Moyses. Torqueant plerimum se divinæ revelationis hostes, et negent Moyse miracula vera fuisse sicut, et prophetias, summum Philosophum habeant, sed nebulonem venditent. Veterum deliria a modernis magno studio exornata renovantur: Argumentis invictissimis demonstrabimus hæc, quæ sequuntur.

1. Moyses non fuit ficta persona, sed vera, verusque Vir Dei.
2. Vera miracula, et plura in suæ missionis testimonium edidit.
3. Maris Rubri trajectio ab Hebræo populo Moyse imperio peracta naturalibus causis explicari non potest.
4. Prophetiæ a Moyse editæ veram Dei virtutem ostendunt.
5. Quæ ad Chronologiam, Legislationem, Historiam, et promissiones spectant optime cum divina Moyse missione conciliantur.
6. Ergo divina Revelatio facta fuit Moyse, et in Pentateuchico existit.

## II.

Pentateuchum, seu quinque Libros Moyse integròs, et genuinos esse plura sunt, quæ vel evidentissime evincunt. Ejus quippe corru-

pioni

prioni obstabant Prophetarum auctoritas, Judæorum zelus, tum ipsius Libris usus, et notitia communis, tum denique factorum, quæ in eo continentur, natura. Sane interpolari non poterat nisi vel a Judæis, vel a Samaritanis, vel a Paganis, vel a Christianis: quis autem ab ullo istorum tantam labem illatam fuisse affirmet? Etenim vel eadem labes in omnibus veteris Testamenti Libris admittenda foret. Sunt quippe cum Pentateucho devincti, et colligati, ut ille labefactari nequeat, quin cæteris omnibus sua pereat integritas. Quæ omnia cum improbari a Deistis nonnisi inutili conatu possint ad illud effugium se recipiunt, ut asserant, Pentateuchum longe post Moysen tempora conscriptum fuisse: immo Increduli breviter, ut solent, alicujus Impostoris factum esse definiunt. Atque in suæ causæ patrocinium suppositionem plurium Librorum Patriarchis, qui Moysen præcesserunt adscriptorum, ipsique Moysi in medium adducunt. Tempus, a-junt, fuit, quo Scripturarum omnium exemplaria deperdita fuere, ut propterea Pentateuchus, et Libri plures veteris Testamenti, qui modo circumferuntur nonnisi Esdram habent auctorem, quem propterea horum Librorum plerique Patres, et historici veteres conditorem unicum consignant. Ergo, clamant Deistæ, ab Esdra Libri veteris Testamenti cum Pentateucho conficti, vel interpolati sunt. Etsi autem minus absurda, falsa tamen illorum opinio est, Libros Moysen fuisse deperditos, quando Philistæi arca Domini potiti sunt, eos autem a Samuele ex diversis fragmentis, quæ supererant fuisse restitutos. Quis enim ctedat nullum aliud tunc temporis fuisse Pentateuchi exemplar præter illud, quod servabatur in arca? Sicut nec Esdræ temporibus omnia periire, Samaritanum sane extiterat. Sunc qui Esdram Librorum conditorem dicunt, quod Chaldaicis Litteris post captivitatem Babilonycam eos descripserit: sed hanc litterarum mutationem non evenisse Eruditi quidam nostræ ætatis defendunt. Neque ulla adjectio facta est, cum omnia consonent cum Samaritano. Si quæ ergo in autographo Mosaico mutatio, non quoad substantiam invenitur, factaque fuit ante decem Tribuum schisma, et ante Samaritici Codicis antiquissimam conscriptionem. Quare sequentes propugnabimus

7. Pentateuchus vere a Moyse conscriptus est, et illius auctor est.

8. Hic Liber hoc sensu integer est, quod non fuit quoad substantiam adulteratus.

9. Tempe-

9. Temere quis assereret Pentateuchum non a Moyse, sed ab alio inspirato auctore fuisse conscriptum.

### III.

Ex Librorum veteris Testamenti revelatione, qua Judaica Religio veritas evincitur ad novi Fœderis, quibus Religio Christiana demonstratur, excurrat oratio. Lex vetus aliam promittebat perfectiorem, quæ illi succedere debebat. Innumera sunt Prophetiæ in veteri Testamento, quibus alius nobis post Moysen Legislator, quem Judæi audire debebant, prædicitur, et abrogata veteri Lex nova annunciat. Dotes, et characteres, ortus, et progenies, tempus, et vita, passio, et mors, novi Legislatoris graphice ab ipsismet Vatribus tot ante sæcula describuntur, et ea omnia ab Evangelistis evenisse legimus. Hi oculati testes fuerunt, illi futuræ rei præcones. Hæc autem Prophetarum vaticinia, figuras omnes, typos, sacrificia, et ritus, adimpleta hæc omnia fuisse in Christo Domino Salvatore nostro invictis argumentis ex ejusdem præcipue Christi Domini miraculis, et vaticiniis demonstramus. Vitæ ejus innocentia, et sanctitas, sublimis, ac vera doctrina, benefecientia, et veracitas, fortitudo, ac patientia divinitatem ejus incūbitanter ostendunt. Sed miraculorum Christi testes sunt Apostoli, omnisque Judaica gens, ut maximum propterea inter Christi miracula, et Alexandri imposturas statuendum sit discrimen: Hic enim in Paphlagonia rudes, et imperitos decepit, non item Athenis, ubi ejus doli detecti fuissent. Christus autem, ejusque Discipuli Jerosolomis, et ubique palam sua miracula ediderunt. Neque Christi miracula Dæmonis arte, vel ingenii calliditate patrata dicantur, cum utrumque Phariseis obijicientibus Christus ipse diluerit. Tanta enim fuit Phariseorum de vita, et operibus Jesu-Christi inquisitio, perpetuumque eum condemnandi studium, ut nonnisi calumnianter hæc possunt Christo iterum opponi. Quamobrem cum ad opera, quæ ipse faciebat hostes ejus appelleret, et non semel facti sint, quod opera, quæ faciebat ipse, nemo posset facere, nisi fuerit Deus in eo; ad eadem opera Incredulos quoque revocamus, ut ipsummet fateantur veram Dei doctrinam, revelationemque annuntiasse. Hic enim imperio suo naturam universam, et Dæmones supponit, uno vocis suæ verbo insanabiles morbi cedunt, maris tempestates, nubium procellæ, fames, sitis, cuncta elementa, et mors obediunt. Quinimmo post mortis suæ triduum ad vitam ipse se restituit, et decies post resurrectionem lo-

quando,

quando; ambulando; edendo, docendo Discipulis suis apparuit; ipsique Apostolis videntibus est elevatus in Cælum. Atque hæc divinam ostendunt virtutem. Plura vaticinatus est futura, quæ eventu comprobata fuere: resurrectionem suam, Judæorum reprobationem, Gentium vocationem, Hierusalem obsidionem, et Templi everfionem, ut annuntiavit, evenisse scimus. Quid ad hæc Deistæ? Miracula Christi miraculis Apollonii Thianxi comparant; plura ridicula, et indigna: omnia tamen verius allegorice intelligenda. Sed hæc omnia insipientiam impiissimam significare sequentibus demonstrabimus.

10. In novo Testamento vere divina extat Revelatio.

11. Vera miracula operatus est Christus in suæ doctrinæ confirmationem.

12. Resurrectio ipsiusmet a mortuis summum, et invictum præbet Divinitatis argumentum.

13. Prophetias quoque edidit plures, et quidem vi tantum divina editas.

14. Ergo Miraculis, et Prophetiis novi Testamenti Revelatio invictè demonstratur.

#### IV.

Deistarum Princeps Genevensis Philosophus se novi Testamenti ac præsertim quatuor sacrorum Evangeliorum doctrina, ac veritate ita percitum fatetur, ut volens nolens divinitatis eorum summum nobis exhibeat elogium, quo nullum fortasse majus apud Ecclesiæ Patres: at illico in iis plura inepta prorsus, et indigna se reperire conqueritur. Nuperus tamen Auctor Criticis fontibus Religionis Christianæ veritatem, et doctrinam se in examen revocaturum, ut magis, magisque pateat, promittit, ac statim ab Apologis veteribus, et recentibus non satis probatum fore, Codicem quatuor Evangeliorum genuinum ad nos pervenisse, et inter apocrypha non esse connumerandum, audacter ostendere conatur; pluribus vero ex historiæ monumentis examen suum instituit, et totus est, ut probet Evangelia non esse genuinos eorum, quorum nomina præferunt, sætus. Hæreses plures exordio Ecclesiæ ortas fuisse, ait; gestorum Christi Libros a pluribus fuisse pingui Minerva conscriptos; quod ipse Lucas initio sui Evangelii admonere non est veritus: hinc Libri apocry-

phi, sup-

phi, supposititia opera ab indoctis, a nebulonibus, ab hæreticis, quorum catalogum texit, conscripta fuere. Inter hæc quatuor Evangelia Matthæi, Marci, Lucæ, et Joannis nomine vulgata inter illa connumerari posse merito dubitatur, suæque dubitationis plura adjicit argumenta. Præterea interpolata ea esse, et supposititia probat ex eo quod aliqua in vetustis codicibus, ut historia apud Joannem de adultera, recitantur, quæ in aliis æque vetustis desiderantur. Infinitæ propemodum sunt variæ lectiones, quarum triginta mille ab aliquibus numerantur. Sed quantum hæc omnia a veritate aliena sint ex ipsissimæ historiæ, et Critices fontibus facili negotio demonstramus. Sane quatuor Evangelia ab Apostolis, primoribus Christianæ Religionis Ecclesiis consignata fuere, vel a viris Apostolicis, quæ ut cælestem thesaurum sancte servaverunt, et inter tot persecutionum, hærefum, ac bellorum procellas immaculate custodita fuisse Irenæus, Origenes, et Tertullianus, alique secundi sæculi, et tertii Patres testes sunt. Quid quod Divi Paulli epistolæ ad tot gentes, integraq; nationes missæ, ab iisque servatæ, quatuor nostrorum Evangeliorum perpetuam mentionem habent? Præterea non tot sunt Evangelia apocrypha, quot Criticus venditat; sed plura ex his unum tantummodo indicant, quod de Evangelio secundum Hebreos, secundum Egyptios, secundum Nazareos, duodicim Apostolorum. Sancti Petri, demonstratum est unum esse Evangelium, Sancti Matthæi ab Hæreticis corruptum; atque sic cætera ad pauca rediguntur, et unum, vel alterum ex quatuor nostris sunt. Veteres Hæretici ex Evangeliiis se tuebantur, se excusabant, nec defuerunt, qui veris rejectis falsa Evangelia substituerent, uti Apelles, Basilides, Cærinthus, et alii: tandem vera falsis miscuere, et aliquibus detractis nostra interpolaverunt. Tot vero variantium myriades lectiones, ex paulo antiquioribus codicibus, tum manuscriptis, tum editis, atque ex meris Grammatices variationibus constare sunt. Innumeri propemodum Codices sacri descripti sunt ut ad plura millia collectorum Vir Clarissimus, quem existimationis ergo hic appellamus, Matthæus Canonici Venetiis servet; at non omnes a doctis Librariis scripti sunt. Quid igitur mirum si menda plurima reperiantur? Adulteræ historia, si in aliquibus Codicibus desideratur, id vel ex antiquo aliquo pio scriptore venit, metuens ne historiam hanc fidelium oculis exponendo occasio inde daretur flagitiose virendi, vel quod magis nobis arridet, in aliquibus Codicibus Montanistæ Heretici, qui adulterium peccatum irremissibile volebant, historiam illam expunxerunt. Quamobrem

15. Quatuor Evangelia Matthæi, Marci, Lucæ, et Joannis sunt genuini, et authentici eorundem sætus.

16. Hæc authenticitatis nota non supposita, sed ab Apologis probata fuit, et invictæ contra Incredulos probatur.

17. Quatuor hæc Evangelia quoad substantiam integra ad nos usque pervenerunt.

## V.

Divinam revelationem a Salvatore nostro publice prædicando, docendo, præcipiendo omnibus doctis, et indoctis factam Apostoli, et Discipuli ejus immediate receperunt, eamque per mundum universum ediderunt, eorumque prædicationem inter innumera persecutorum, et Philosophorum maledicta, ludibria, et verbera, eam constanter non armis, et vi, non artibus, et fraude, sed summa animi fortitudine ad mortem usque sustinuerunt, suoque sanguine confirmarunt: Hi testes sunt revelationis, sicut et resurrectionis Christi. Mirum est quantum Deistæ adlaborent, ut Discipulorum Christi testimonium infirmet, illudque in erroris suspensionem inducant. Apostolos, ajunt, et deceptos, et decipere voluisse partium studio abreptos: divites, et doctos primis temporibus non credidisse, sed rudentantum, et pauperes; deinde Magnates credidisse humanis tantum, et carnalibus ductos rationibus, ut propterea homines Christiana Religione meliores effectos haud fuisse. Præterea ab Judæis, et Gentilibus Jesu-Christi, et Apostolorum gesta nulla memoria tradita sunt, nulloque laudis argumento recepta. Hæc omnia impiæ, et desperatæ causæ specimen sunt, et argumentum, pluribusque rationibus ex historia depromptis refutantur. Sed miraculis ab Apostolis, et Viris Apostolicis patrat, sed plurimorum martyrio veritatem ipsam demonstramus: nam illi profecti ubique prædicaverunt Domino cooperante, et sermonem confirmante sequentibus signis. Stupendum, et irrefragabile certe miraculum fuit prodigiosa Sancti Pauli conversio, ad quam Incredulos revocamus: donum linguarum Apostolis impartitum, morborum omnium sanationes, propheticam vim ipsis opponimus. Quæ omnia ab aliis etiam in nomine Christi post Apostolos in vera Ecclesia patrata fuisse synchroni historici testantur. Fatemur tamen pia fraude omni tempore miracula plurima fuisse conficta: sed quis ex hoc omnia pernegandi ansam desumat? Sicut enim aliqua sunt, quæ sine temeritate negari nequeunt, ita alia sunt, quæ sine fidei periculo, ut

falsa.

falsa haberi debent. Inter hæc autem alia sunt, de quibus vir prudens iudicium suspendet, quin ad ignorantiam, vel ad fanaticum cum Deistis indiscriminatim omnia amendantur. Ex quibus hæc quæ sequuntur

18. Quæ in novo Testamento facta narrantur. omnimodam fidem merentur.

19. Apostoli id optimo jure poterant, et miraculis comprobantur.

20. Martyrio quoque id confirmantur.

21. Virtus patrandi miracula a Christo Domino Apostolis, eorumque successoribus collata fuit, perpetuoque servatur.

## VI.

Revelationem Apostolis a Christo factam, non omnem scriptis in Evangelio, vel epistolis mandarunt; sed ore tradiderunt. Traditionis nomen doctrinam significat ab uno alteri traditam, voce, et scripto firmatam: hic tamen pressius sumitur pro eo, quod a Deo revelatum est, et a nullo Auctore Canonico litteris mandatum, seu pro doctrina a Christo, ejusque Discipulis viva voce tantum communicata, quamvis postea ab aliis fuerit etiam litteris consignata, ex hoc enim sanctorum Patrum doctrinæ utilitas, & necessitas, uniformitas, atque sanctitas demonstrantur, in dogmatibus fidei, et morum præceptis, ac disciplinæ præiunctione sancienda. Porro traditiones, de quibus nunc disputamus vel Divinæ sunt: quæ immediate a Christo Domino suam originem ducunt, vel Apostolicæ, quæ ab Apostolis Ecclesiæ traditæ sunt, quæ etiam Divinæ dici debent, quia ab Apostolis suggerente Spiritu Sancto nobis relictæ sunt. Utræque Verbum Dei traditum constituit. Heterodoxi verbum Dei, quod sacris in Litteris non continetur, dictum, vel imperatum a Christo nullum esse contendunt; aut saltem quod articulum fidei non constituat: At si res ita foret jam actum omnino esset vel adiaphoræ opinionones dicendæ forent, quæ a Catholicis de Librorum sacrorum Canone, de Beatæ Virginis Mariæ perpetua Virginitate, de septenario Sacramentorum numero, de forma, et materia uniuscujusque, de Purgatorio, de Indulgentiarum vi, et usu, de invocatione, et veneratione Sanctorum, Reliquiis, et Imaginibus firmiter credendæ proponuntur, sicut et de Romani Pontificis Primatu, Conciliorum Œcumenicorum infallibilitate, Ecclesiasticis Censuris, jejuniorum ob-

solutio.



## X 31 X

servatione; aliisque pluribus; de quibus Synodus Tridentina suis locis manifestissime decernit. Sed cum in traditionibus decernendis liberum omnino vellent uniuscujusque judicium, Græci Schismatici, et Protestantes cum Catholicis nunquam convenire potuerunt. Antiquum est, acerbumque hæreticorum omnis ævi in traditiones bellum, et hoc ab ipsis ad Novatores derivatum, et qui a primis Ecclesie sæculis fieri in eas cepit impetus, nedum ætate nostra restinctus est, sed adhuc pertinacissime durat; nam si quidquam agnoscendum sit, quod præter scripturas sacras divinam habeat auctoritatem, si traditioni sit standum, si ab ea petendus germanus scripturæ sensus, probe intelligunt dandas Catholicæ Ecclesie manus, mittendumque avitis erroribus nuncium. Ab ipsismet sacris scripturis, a Græcis, a Latinisque Patribus, desperatæ causæ patroni auxilium quærunt, nihilque non moliuntur, ut traditionem omnem funditus tollant. Eo etiam se confugiunt, ut sanctorum Patrum auctoritatem excludant, quod de eorum operum suppositione Catholicus aliquis argumenta præbeat dubitandi, quo non Pyrrhonistæ modo, sed maximum hæreticis contra traditiones detur suffragium. Sed cum demonstratum sit plures traditiones falsas, fabulosasque vulgari; et diu receptas fuisse, hinc etiam argumentum petunt ad veras eliminandas: cui equidem opponimus nonnullas veræ traditionis regulas, sex nempe, quas si opus fuerit defendere parati sumus; quamobrem rem hanc totam his propugnabimus.

22. Non verbis scriptis tantum; sed orali traditione divina quæ petenda est revelatio?

23. Hæc autem revelatio, vel immediate a Christo; vel a Spiritu Sancto Apostolis facta, certissimam exhibet fidei regulam.

24. Atque hæc quidem traditio necessaria est ad orthodoxum sacre Scripturæ sensum determinandum.

25. Ad quædam fidei, morumque dogmata; quæ in sacris Litteris non continentur sancienda.

26. Ad sacrarum Scripturarum Canonicos Libros decernendos divina hæc necessaria est traditio.

27. Ecclesie Græcæ Patres non modo nihil habent contra traditionem, sed eam omnino probant, et confirmant.

28. Latini quoque Patres omnes in eandem veritatem conspirant.

29. Unanimis Patrum in aliquo asserendo dogmate consensus certissimum præbet traditionis argumentum.

30. In traditionibus definiendis, sicut in sacris Litteris exponendis, non licet ab unanimi sanctorum Patrum sensu recedere.

31. Traditionis itaque argumentum, et sanctorum Patrum auctoritas in fidei gratiam non sunt disjungenda, sed simul expostulanda.

## VII.

Nunc autem ad sacræ Exegeticæ regulas Theologum propius advocamus. De recta siquidem agimus, et tuta revelationis divinæ scriptæ, vel traditæ interpretatione, et usu. Novatores, et Increduli studium omne impendunt, ut liberum unicuique sit examen inire in determinandis articulis fidei; negant vero, remisque omnibus exprobrant viam auctoritatis, quam Catholici omnibus doctis, indolisque præscribunt, cum omnibus nec possibilibus, nec tuta examinis via haberi possit: Ex via auctoritatis errores plures derivari, Pyrrhonismum præcipue, opponunt: dilucide tamen a nobis exponitur viam auctoritatis ad Pyrrhonismum non ducere, cum potius evidentissimum sit nulla alia ratione posse hunc evitari, quam se committendo infallibili Ecclesiæ iudicio; falsum insuper, quod via auctoritatis homines ratione, et libertate expoliat, Indifferentismum invehat: falsum, inquam, nam hæc omnia nasci, et propagari vidimus apud eos, qui repudiato tutissimo Ecclesiæ iudicio, fidei nostræ capita in examen vocare præferunt. Demonstratum est continua experientia examinis libertate a Pseudo-Reformatoribus concessa ostium immane reformatum fuisse Scepticismo, Indifferentismo, Fanatismo. Hinc integræ sectæ Quakerorum, Anabaptistarum, Davidicorum, Inspiratorum, seu Neo-Prophetarum, Cabenensium. Deismus ipse, impius error, undenam? Primi, et celebriores hujus impietatis Coriphæi, et propagatores ex Protestantibus. Tunc enim discessum a primæva credendi simplicitate, et de omnibus disputando omnia confusa sunt, et perturbata. Hinc et Atheismus, nam si quis Catholicum auctoritatis sistema rejicit, latum ad Atheismum statim aperit iter: ab Catholicismo ad Atheismum facillimus gressus adest. Temporibus Cromwellianis Indifferentismi, Deismi, omniumque errorum epocha fuit, quando scilicet cuilibet permisum erat quidlibet credere, ac profiteri. Jure ergo sequentes Theses

32. In divinæ revelationis dogmatibus determinandis via examinis non est omnibus possibilibus, et tuta.

33. Immo

## X 33 X

33. Immo periculosa alea plena, omniumque damnatorum dogmatum fons, et origo.

34. Latitudinarismus, seu plurium Religionum, ac omnium simultaneitas ex Novatorum sistemate derivatur.

35. Via autem auctoritatis omnibus possibilis, et tuta, et Religionis utilitatem unice ostendit.

36. In auctoritate admittenda nec totum rationi datur, nec ipsi totum aufertur.

37. Catholicus ergo non est Irrationalista.

## VIII.

Heterodoxi omnes, quo facilius Ecclesiae Catholicae iudicium in fidei controversiis declinent pertinaciter contendunt, Dei verbum scriptum tanta claritate, et perspicuitate gaudere, ut ipsum sui veri sensus unica norma, certum testimonium, et infallibilis iudex, et interpretes sit. Attamen hac in re non idem omnes, et semper constans iudicium suum produnt. Modo enim hanc claritatem universae scripturae tribuunt, eamque absolutam, videlicet, non dissimilem ab ea Solis, qua ipse in se clarus est, et manet, sive homo oculos aperiat, sive claudat, sive videat, sive caecus sit. Et sane quid aliud intelligere videntur illi, dum urgent in hac quaestione adversus Catholicos scripturae loca, quibus verbum Dei generatim luci, et lucernae comparatur? Modo vero hanc perspicuitatem solummodo partialem vocant, nempe, in iis locis, quae fidei, et salutis sunt. Hinc inferunt interpretationem scripturae non ad traditionem Ecclesiae, non ad rationis dictamen, non ad lumen aliquod internum, sed ad fidei Analogiam, seu normam, ac Cynosuram, ut vocant, quamdam exigendam. Sed falluntur, et sibi ipsi contradicunt. Si tanta est scripturarum claritas, et perspicuitas, quid causae est quod in hermeneuticis suis operibus tot tradant Logices, et Critices, necessaria praecipua? Cur linguarum Orientalium, et universae Phylologiae studium commendant, et pro Auctoris sacri scopo assequendo vetera monumenta omnia prophanae, et Ecclesiasticae Historiae in subsidium vocant? Deinde cur tot inter ipsos adversae interpretationes, cur saepe errant? Atque haec ad totalem scripturarum claritatem, nunc ad partialem. Si tanta illorum locorum est perspicuitas eccur tot de illis, multiplicesque Interpretes, et Religionis haereses? Hujus varietatis causa, licet in variis, diversisque Interpretum affectibus aliqua ratione refundi debe-

at, pra-

at, præcipuam tamen in locorum intrinseca difficultate positam esse defendimus. Jam vero si articuli fidei sunt, qui clarissimis verbis, et omni exceptione majoribus in divinis Codicibus traduntur, causam vicerunt Sociniani, et Naturalistæ, qui ob id unicum tantum fidei articulum volunt, nimirum Jesum advenisse, ipsumque esse Christum. Igitur cum nulli sint in scripturis fidei articuli etiam totidem verbis expressi, qui obscuritati non subiaceant, et per se probatione non indigeant, sequuntur argumenti capita

38. Sacra Scriptura non est ita per se clara, et perspicua, ut quilibet ejus sensum facillime assequi valeat.

39. Nec claritas hæc, et sensus perspicuitas habetur si Analogiam fidei quis præ oculis habeat.

40. Claritatem hanc ipsam, neque in locis ad fidem spectantibus intueri datum est.

41. Analogia fidei non est prima, et vera Hermeneuticæ sacræ norma.

## IX.

Cum aliunde, quam ex ipsa Scriptura, veræ interpretationis criterium, et judicium depromi debeant, Lutherani, et Calvinistæ hujus declarationem, et definitionem a Spiritu-Sancto repetunt. Sed si ab ipsis postulemus, quid per hunc Spiritum intelligant, non idem referemus responsum. Quidam enim jus suum interpretandi Scripturas esse dicunt penes Spiritum-Sanctum in Scriptura loquentem. Alii autem hoc nomine intelligunt interiorem animi cælestem illuminationem, persuasionem, et nescio quam impulsione ex dono gratiæ dimanantem, sine qua nil certi quis intelligere, et judicare possit de vero sacrarum Litterarum sensu, et in toto Religionis negotio, quem etiam spiritum privatum per rationes inexplicabiles, quibus divini luminis radio aliqui se veritatem agnoscere affirmant, exponunt. In hoc tamen conveniunt omnes, ut asserant spiritum privatum esse posse, et debere legitimum interpretandarum scripturarum judicem. Verum dum hæc statuunt, ut dissensiones in Hermeneutica sacra tollant, non advertunt e contrario eas in immensum augere. Satis unum sit Quakerorum, seu Tremulorum sistema, quod tot turbas in Anglia, et Pensilvania excitavit, et modo excitat, ex hoc Lutheri privato spiritu dimanare. Qui Spiritui-Sancto in scripturis loquenti de-

finiitio-

fnitionis iudicium tribuunt, cum eum a scriptura non distinguant, nihil aliud solidi conficiunt; agnoscimus enim scripturam esse oportere fidei normam, non autem sui ipsius interpretem, et controversiarum iudicem, quæ imperite confundunt illi, cum alterum ab altero distinguendum nemo non videat. Superest postremo ut testimonium interioris Spiritus-Sancti, persuasionis, impulsione, quam singulis regentis Fidelibus concedunt illi, paucis expendamus. Divini Spiritus illustrationem, et gratiam, ad veram scripturarum intelligentiam, et ad plenam, certamque de ea persuasionem et nos agnoscimus necessariam. Ast undenam, et quibus oraculis probabunt hanc spiritus illuminationem ipsis, et cuique fidelium certo promissam esse? Profecto experientia contrarium demonstrat. Etenim nemo ignorat, quæ, et quanta certamina inter ipsosmet Reformatos circa fidei articulos, et scripturarum sensum peperit hoc privatum Spiritus-Sancti dictatum. Cui malo frustra, et irritò successu mederi tentarunt per confessionem Augustanam, dein per Articulos Smalcaldicos, et tandem ope formulæ Concordiæ. Etenim potius inde majores intestinas discordias experti sunt. Sed quid dicemus de tot scripturarum versionibus? Quæ omnia conciliari equidem possunt cum spiritu nequam contradictionis et mendacii, minime vero cum illo Sancto pacis, et veritatis spiritu. Sint itaque

42. Internum lumen, cæleste donum, mentes cujuslibet hominis illustrans pro exponendis scripturis, et in Religionis negotio commentitium prorsus est.

43. Privatus cujusque hominis Spiritus, quocumque sensu intelligatur, esse nequit explicandæ divinæ Revelationis interpret.

44. Multoque minus fidei controversiarum iudex.

## X.

Suas in Revelatione partes rationi humanæ dandas præcipimus, non tamen omnes. Turpiter propterea hallucinantur Rationalistæ, qui in scripturis nil admittendum volunt, quod ipsa ratio per se capere nequeat: implicare contradictionem, quod rationis captum excedit. Deus enim, sic argumentatur Genevensis Philosophus, quem adoramus, non est Deus tenebrarum, nec ideo homini rationem largitus est, ut ea non uteretur. Verum hic Auctor non meminit se

alibi

alibi docuisse, Deum utpote Ens infinitum, lumen adeo nostræ rationis excedere, ut vix aliud agnoscere possimus, quam ipsum existere. Tum alibi Deo primo veritatis fonti esse omnem fidem præstandam, etiam in mysteriis, quæ illam longe superant; quo ipso dum rationis, et Philosophiæ supra Theologiam imperium dilatare, et stabilire student, subinde eorum, quæ ipsamet ratio manifeste docet, se prorsus ignaros demonstrant. Hæc ille. Ergo si horum aliqua manifestata nobis exhibeant veteris, novique præsertim Fœderis Libri, ea cogimur amplecti. Nec est cur Rationalistarum aliqui ad declinandam difficultatem se concedere dicant fidei mysteria supra rationem antequam revelentur; non vero post eorum revelationem: etenim mysteriorum, quæ etiam revelata sunt, sive naturam, sive existentiam spectemus, supra rationem adhuc esse videntur: natura siquidem, quia humanæ menti ininvestigabilis remanet; existentia vero quia licet hæc pateat certa, et clara cognitione, non alio quam revelationis principio innitur. Deum, dicunt, injuria fidem suorum oraculorum, quæ revelavit ab homine exigere: Immo reponimus, quia re magis, quam hoc obsequio experietur perfectam suarum creaturarum obedientiam, humana superbia deprimetur, animum nostrum ad cælestia avocabit. Sed ratio evidentiam, non item revelatio parit: obscura ergo per clariora explicanda. Sed revelationem nulli vel minimo errori obnoxiam, bene vero rationem quis dubitat? Jure ergo affirmare possumus

45. Ratio humana in sacra hermeneutica solius revelationis certitudinem, uti ancilla, detegit.

46. De rerum veritate sola fides, ut domina, assensum exigat.

47. Perperam munus interpretandæ revelationis puræ rationi tribuitur.

48. Quæ revelata sunt eadem manent, quod erant ante revelationem, post etiam revelationem.

## XI.

Vidit non nemo ex laudatis Novatorum principiis omnium falsorum dogmatum fontem apertum iri, nisi aliqui limites figantur, atque ut hæc mala tolleretur, distinctionem invexit Articulo-

rum fundamentalium, et non fundamentalium; ita ut in his tantum postremis sit unicuique sentiendi, prout maluerit, potestas, non item in aliis, in quibus uniuscujusque doctrina, et fides conformes omnino esse debent. Sed cum in Articulis fundamentalibus, et non fundamentalibus statuendis, et illis ab istis discernendis nondum conventum sit, nec hujus systematis Auctor satis hac in re se explicuerit, hoc quoque speciosum effugium refutamus. Mirum profecto est quantum se torqueant, quantumque studii, et meditationis impendant, ut hoc statuant; sed cum semper Catholicorum argumentationis vim, et efficaciam non effugiant, invanum laboraverunt, qui ædificant illud. Et nos distinguendos esse Articulos quosdam capitales dicimus, alios autem minus principales, sed utrosque dicimus credendos esse. Articulos capitales eos vocamus, quos nemo vel rudis ignorare potest citra salutis dispendium; minus autem principales, quos inculcate illitterati ignorare possunt, ita tamen, ut saltem implicite illi credantur, et nullum vel minimum fidei dogma ab Ecclesia definitum negare posse unanimiter docent. At si a Tolerantibus petamus, licitum asserunt, liberumque esse, citra salutis dispendium nonnulla fidei dogmata ab Ecclesia definita rejicere, dummodo fundamentalia non sint. Verum non licuit unquam, nec modo licet, quicumque enim vel a primis Ecclesiæ sæculis in aliquo dogmate, quodcumque illud sit, dissentit, veluti Hæreticus semper habitus fuit, et modo habendus est. Præterea, quos unus Hæreticorum Articulos fundamentales vocat, negat alter, quos Sabellius agnoscit, negat Arius, quos Nestorius admittit, negat Eutiches, quos Lutherani fatentur, explodunt Sociniani. Quid amplius? Quod Christiani consentunt, execrantur Judæi, quod Gentiles amplectuntur, Mahumedani rejiciunt. Hi limites sunt, quos novi systematis Auctor ad Latitudinarismum præcludendum, amplissimos posuit. Hinc sequentibus novum sistema revincemus

49. Commentitia prorsus est Articulorum fundamentalium, et non fundamentalium distinctio.

50. Hanc Tolerantismi latissimam viam, quin præcludere, reserare defendimus.

51. Nemini enim licet citra salutis dispendium fidei dogmata ab Ecclesia definita, quæcumque ea sint, rejicere.

# THEOLOGICARUM EXERCITATIONUM

## PARS TERTIA

### DE DIVINÆ REVELATIONIS INTERPRETE ET JUDICE.

#### I.



Unam iudex *Controversiarum fidei*, et veri sensus scripturarum, ut solum *Hermeneuticum Catholicorum principium* demonstremus, definiendus est. Hunc constituit Deus. Cum enim Religio revelata ideo hominibus data sit, ut iisdem fidei principiis, morumque præceptis, uno pacis, et charitatis vineulo devicti in societate contineantur, et ad eundem immortalitatis finem perveniant omnes; cumque ea non singulis hominibus immediate, neque omni tempore concessa sit; sequitur necessarium, ut Deus bonus, ac providentissimus quosdam determinatos viros elegerit, quibus doctrinam hujus Religionis suæ custodiendam, et aliis prædicandam, explicandamque tradiderit. Ita primo in naturæ, et scriptæ legis statu, Patriarchas, Seniores, Pontifices, Sacerdotes constituendo factum est. Et in novo fœdere eandem pene regiminis formam, aut saltem non admodum dissimilem a Judaica, Christus Dominus pro ea, qua, ut verus homo, verusque Deus pollebat auctoritate, instituit, Pastores Ecclesiæ præsertim in rebus Religionis, et fidei, deligendo. Neque enim hic definire volumus Christum Ecclesiam fundasse ad plenam Synagogæ formam, modo aliis definiendum reliquimus. Constant imprimis duodecim Apostolos, et dein septuaginta Discipulos elegisse, qui essent ministri sui, et dispensatores mysteriorum Dei ad custodiendum Evangelium, et longe, lateque per universum orbem disseminandum. Interim dedit ei potestatem ligandi, atque solvendi, variaque donorum munera ad regimen Ecclesiæ nec-

cessaria



cessaria largitus est. Hujus instituti regiminis cum accuratioribus Interpretibus perspicuum nobis argumentum præbere videtur idem Christus, cum eum, qui fratrem læserit, nec aliter emendari, aut ad peccati agnitionem perducì posset, Ecclesiæ demandandum jubet. Etenim ibidem Ecclesiæ nomine innui intelligimus Ecclesiasticum Senatum, seu Presbyterium, quod polleat sua auctoritate judicii. Quid enim aliud est Ecclesia? Cœtus hominum ejusdem Christianæ fidei professione, et eorundem Sacramentorum communione colligatus sub regimine legitimorum Pastorum, ac præcipue unius Christi in terris Vicarii Romani Pontificis. Quam quidem definitionem non novam esse, sed a Sanctis Patribus primi, et secundi sæculi usurpatam defendimus. Quamobrem merito Apostoli jus interpretandi Scripturas, et fidei controversias dirimendi privatis denegant personis, sibi que duntaxat, cæterisque aliis, qui ad hoc munus vocati, et adlecti sint, uti proprium arrogant. Hoc Ecclesiæ judicium uti verum ab omnibus complecti, et credi debet, illudque falli nescium esse necesse est. Scimus quippe Deum Spiritum suum huic Ecclesiastico Senatui semper promississe. Ad cujus rei plenam intelligentiam sequentes defendemus

1. Deus in œconomia suæ Ecclesiæ quosdam elegit custodes, et magistros Religionis.

2. Hoc præstitit in veteri Testamento, Patriarchas, Moysen, Prophetas, et septuaginta virorum Senatum eligendo.

3. Hoc in novo quoque fœdere Apostolis duodecim, et septuaginta Discipulis.

4. Jus ergo istud non est penes quempiam fideliū.

5. Neque apud sæculares Magistratus residet.

6. Sed penes Ecclesiam, seu Presbyterium, et Episcopos, quos posuit Deus regere Ecclesiam suam.

7. Ecclesia isthæc visibilis esse debet, nec in aliquibus occulta consistit.

8. Quæ persecutorum, aut hæresum temporibus nunquam legitimis successoribus cessavit.

9. A veritate insuper non defecit unquam, nec deficere potest.

10. Schismatici, et hæretici, qui se ab hac Ecclesia separarunt, Apostatæ, et Excommunicati non sunt Ecclesiæ Christi membra: bene vero peccatores.

11. Huic autem Ecclesiæ summa, et infallibilis collata est au-

Revitas

Auctoritas in determinandis quæstionibus fidei, et morum.

12. Quæ infallibilis auctoritas in Patribus tantum reperitur, non quidemdivisim, sed collectim consideratis.

13. Et collectim quidem, licet loco diffusi, dum in aliquo dogmate simul conspirant.

14. Tum etiam dum omnes, si non physice, moraliter tamen simul in Conciliis coeunt, et unanimiter sentiunt.

15. Concilia ergo generalia rite, ac legitime celebrata in fidei, morumque definitionibus errare non possunt.

16. Infallibilem suam auctoritatem a Christo receperunt, qui Spiritum-Sanctum eis adfuisse incessanter promisit.

17. Singula Concilia, quæ vere Oecumenica sunt, hac gaudent infallibilitate, et judiciali potestate.

18. Infallibile ergo Ecclesiæ testimonium divinæ Revelationis interpres, et iudex est.

## II.

Qui Indifferentismum, ac Tolerantismum, multoque magis, qui Ecclesiam invisibilem sibi constringunt, supervacaneum putant inquirere, et definire quænam sint veræ Christi Ecclesiæ notæ, quibus nempe vera a falsa distinguatur, cum vel nullas esse, vel invisibiles pronunciant. Sed turpissime errant, et viam parant, ut alios quoque in errorem inducant. Per notas Ecclesiæ intelligimus certa quædam, et indubitata signa sensibilia, et facilia, quibus vera Christi Ecclesia discerni possit ab Hæreticorum, et Schismaticorum societatibus, quæ veræ Ecclesiæ titulo gloriantur prorsus immerito; et ita quidem, ut veræ Ecclesiæ sint propria, nec alteri societati conveniant, sint ipsa Ecclesia notiora, cum ad ipsius notitiam perducant, omnibusque sint obvia, et accomodata, ut scilicet docti, indoctique homines, dummodo diligentiam adhibeant, facili negotio veram possint dignoscere Ecclesiam, cui nomen dare, et in qua permanentes salutem consequantur æternam. Solemne enim semper fuit hæreticis suas factiones, et sectas sacro Ecclesiæ Christi nomine insignire, et ut elegantibus gravissimi Canariensis Episcopi verbis utar, hoc gentile, simul atque sese Ecclesiæ auctoritate urgeri vident, aut illam spernere, aut Ecclesiæ rem ad se, nomenque transferre, et eam in illis esse negare, in quibus revera est. Profecto Lutherani, et Calvinistæ cum cæteris Novatoribus solam prædicationem cum legitimo Sacra-

mento-

mentorū Baptismi, et Cœnæ usu notam veræ Ecclesiæ esse defendunt; ita tamen, ut si quidpiam vitii, vel in doctrina, vel in Sacramentorum administratione obrepat, adhuc in Ecclesiæ communione quis permaneat, quod quidem ad mutuam tolerantiam verbis saltem si non re fovendam præmittendum ab ipsis necessario erat. Sed hæc duas notas, licet veræ Ecclesiæ naturam designent, docti, et indocti pariter assequi facili negotio non possunt, cum nec sensibile, nec patens deferant propriæ veritatis Criterium, sed post diligentissimum et accuratum examen constare unice possint. Superest ergo, ut cum universis Christi Pastoribus legitime ab Apostolis succedentibus, cum Constantinopolitanæ Synodi fide, dicamus, veram Christi Ecclesiam esse debere: Unam, Sanctam, Catholicam, et Apostolicam, talemque confiteamur, et vindicemus. En igitur cunctis hominibus sensibiles, patentes, et faciles notæ. Hæ sunt in Lege, in Psalmis, in Prophetis prælatæ, atque etiam ipsius Christi ore promissæ. Verum hæ uni tantum Romanæ Ecclesiæ conveniunt, cæterisque societatibus opponuntur. Ex quibus necessaria consecutione sequentes damus

19. Neque vera Doctrina, neque legitimus Sacramentorum usus sunt veræ Ecclesiæ notæ.

20. Genuini Ecclesiæ Characteres sunt, Unitas, Sanctitas, Catholicitas, et Apostolicitas;

21. Vera Christi Ecclesia ita esse debet Una unitate fidei, et regiminis, ut excludat alias quascumque societates, quæ fide, et regimine diversæ demonstrantur. ¶

22. Ita autem Una est Christi vera Ecclesia, ut extra ipsam nulla speranda sit æterna salus.

23. Unitas non convenit Protestantium, nec nostrorum temporum Hæreticorum societatibus. ●

24. Nec convenit etiam Orientalium societatibus ab Ecclesia Catholica-Romana separatis.

25. Ecclesia Catholico-Romana tantum unitate fidei, et regiminis Una est.

26. Nulla Orientalium, vel Occidentalium societas ab Ecclesia Romana separata veram sanctitatem habet.

27. Sola Ecclesia Romana habet sanctitatem doctrinæ, quam immaculatam, quoad fidem, et mores, servavit.

28. Sancta quoque est sanctitate plurium ipsius membrorum, quorum successio nunquam cessavit.

29. Sancta

29. Sancta<sup>a</sup> demum est gloria miraculorum, quibus fundata, et confirmata fuit, quibusque omni tempore decoratur.

30. Ecclesia eo sensu Catholica est, quod moraliter ubique diffusa sit.

31. Sola Ecclesia Romana vere dici potest, et est Catholica.

32. Vera Christi Ecclesia Apostolica esse debet ratione originis, ratione doctrinæ, ratione Pastorum sibimet continua serie succedentium.

33. Nec Orientalium, nec Protestantium societates vere sunt Apostolicæ.

34. Ecclesia Romana vera est Apostolica.

35. Ergo Ecclesia Catholico-Romana vera est Christi Sponsa divinæ Revelationis infallibilis interpres, et iudex.

### III.

Constituta jam inter homines a Christo Ecclesia vivus iudex, et interpres suorum verborum, et ab Apostolis per mundum universum propagata, cum hæc unum visibile, et militans corpus efficiat, visibile caput in terris habeat, necesse est, ut pes, manus, et mens suum officium faciant, ut non sint sine Pastore oves, atque ne Christus in his, quæ necessaria sunt Ecclesiæ suæ desuisse videatur. Quamvis enim regimen Ecclesiæ a Christo statutum alterius generis ab omni, quo societas humana regitur, ut fortassis non sine Christi injuria Monarchiam, vel Rempub<sup>l</sup>icam plerique illud appellent, dieatur; Ecclesiasticum tamen, et spirituale licet sit, corporis naturam ex unione, et harmonia partium, ordinata structura, perenni actione perpetuo servata, et caput naturæ ejusdem visibile, quo uniatur, quo ordinetur, vivat, et operetur, habeat, oportet. Hinc sapientissime Salvator noster Petrum constituit Apostolorum Principem, et in Ecclesiæ regimine, quod in universa, et varia imperantium terrenorum politia, unum semper esse debebat, quin mutaret imperium ullum, vel scinderet, quodque non honoris tantum, sed et jurisdictionis primatum obtinuit, qua equidem prærogativa Petrus ipse in tota Ecclesia jure divino in fidei firmitate, et in componendis Religionis controversiis potitus est. Quamvis ergo cæteri Apostoli prædicandi, docendi, regendique Ecclesiam Christi illimitatam obtinuerint ab ipsomet Christo potestatem, quamvis Paulus Apostolatus officio, et in fundandis Ecclesiis parem cum Petro honorem

promeruerit, et dignitatem; solus tamen Petrus in Ecclesia Primatum tenuit, cui soli, suisque successoribus Christus hanc tradidit prælationem. Sed ab Hæreticorum telo Petri Primatia in tutum posita, ubi sedem fixerit, et suæ dignitatis successores dederit, inquirendum. Romam nec adventasse ipsum unquam aliqui post Marsilii Patavini Romanæ Sedis insensibilis hostis dubitationem, audacissime scripsere, illucque si forte venit non obiisse tamen. At si hæc omnia alii concedant, negant tamen pertinaciter Romanum fuisse Episcopum, ut deinde facili negotio successores omnes, qui Petri in Romana Cathedra dicuntur nulla prærogativa Primatus habeant, vel si aliqua honoris, nulla jurisdictionis illis danda sit. Facti res hæc est, ex historiæ documentis, non ex puris placitis, et conjecturis derivanda. Fuit postremis temporibus Anonymus Auctor doctrina, et pietate clarus Jurisprudentiæ Ecclesiasticæ universæ nova methodo traditæ Scriptor, qui spreta omnium Catholicorum sententia cum Heterodoxis Petrum non fuisse Romanæ Urbis Episcopum, sicut nec ullum Apostolorum proprium aliquem Episcopatum tenuisse, omnesque, universales Episcopos ad mortem usque permansisse, viribus omnibus defendere conatur. At cum neget ille proprium Episcopum fuisse non Civitatis alicujus, sed et regionis se intelligere debet. Qua in re ipsi statim non suffragamur: Apostoli enim omnes post Christi Ascensionem, eorumque Spiritus-Sancti ductu dispersionem, non amplius universale, sed peculiare consecuti sunt in regionibus, ubi primum accedebant Episcopale officium, sicut et Apostolorum; Bartholomæus in India, Matthæus in Ethiopia, Matthias in Judæa, Andreas, et Philippus in Scythia, Thomas in Bragmania, Jacobus Jerosolymis, Joannes Ephesi, ibidemque statim Episcopos constituerunt proprios regionarios, qui alicubi sedem figere certe debuerunt. Non ergo a Presbyteris, Parochis nempe, statuendis, quod Anonymo argumenti caput est, sed ab Episcopis cæptum est Ecclesiasticum regimen, ex Presbyterorum, non Parochorum, et Diaconorum Senatu. Parochorum quippe institutio in Pagis, et Campestribus Locis ab Episcopi sede distans, non nisi post tertium sæculum, in Urbibus ad decimum, solidis monumentis probatur. Male ergo interpretatur, falsoque concludit non nisi post Æræ Christianæ annum quinquagesimum septimum, alicujus Episcopi factam fuisse institutionem, ut scilicet ante datam epocham Parochos primum constitutos probet. Sed ad Petrum redeamus: hic ille Apostolus est, cui universalis Ecclesiæ regimen, et Episcopatus unice traditur: hic et regionarius proprius Episcopatus non uno

in loco

in loco fuit, hic Romæ universalis Episcopi Sedem fixit, ibique, et ut Romanæ Urbis, et ut Italicæ regionis, et ut totius Mundi vere Episcopus Spiritus-Sancti duæ sedit, tantamque dignitatem ad mortem usque retinuit. Cumque non unum, sed plures instituisset regionarios Episcopos Occidentis, Linumque præsertim, Cletum, Clementem sibi adjunxisset Cooperatores, sui que Vicarium Linum adlegisset; defuncto Petro in eadem Petri Sede Linus electus est. Licet primorum Pontificum seriem, et Chronotaxim pluribus implexa sit difficultatibus ut ex vetustis monumentis pariter a Lino incipiant aliqui, a Clemente alii, et inter eos, qui a Lino, sicut, qui Cletum post Linum signant, et alii Clementem, et ante Clementem aliqui Cletum, et post Clementem Anacletum, alii post Linum, et Clementem Cletum, et Anacletum, tandem Cletum, et Anacletum alii non duos, sed unum habeant; novæ tamen Anonymi Chronotaxi haud subscribere possumus, ut Linus nempe a Romanorum Pontificum serie excludatur, et primus omnium Clemens admittatur, cui cum Lino in Episcopatu proprio Urbis Romæ successerit, Petrus ante sui obitus diem universalis Ecclesiæ regiminis dignitatem commiserit, Clementi vero Cletus, Cleto Anacletus successerint: hæc sane Chronotaxis et opinio cum a recepta Catholicorum omnium opinione omnino recedat, cum dubia, et incerta pleraque supponat, cum certissimis historiæ monumentis non conveniat, et hæreticorum sententiam foveat quammaxime, et tueatur, rejicienda prorsus est. Hæretici enim toti sunt, ut Petrum Romanum Episcopum fuisse negent, ut Romani Pontificatus Primatus jura explodant; at si primum ipsis concedatur, jam veluti commentum Anonymi placitum irridebunt, asserantque toto sæculo Ecclesiæ primo Clementem Ecclesiæ regimentenuisse; etenim triginta tribus annis post Petrum rexisset Ecclesiam Auctoribus melioris notæ, et historicis affirmantibus tertio Trajani anno, Æræ vero Christianæ centesimo secundo, obiisse, Lino propterea, Cleto, Anacleto, et Evaristo a Pontificum Catalogo prorsus rejectis, et sibi manus dandas prorsus ab omnibus esse gloriabuntur. Sed quod maximi momenti est, quod Sedes, et Cathedra Romanorum Pontificum non amplius Sedes, et Cathedra Petri jure, meritoque dicetur, nec amplius Cathedræ Romanæ hæreditaria successione Primatus, jurisdictionis asseri poterit. Nec quidquam valet Anonymi effugium, quod Petrus Cathedræ Romanæ non personæ Clementis, tantam concesserit dignitatem. Nam præterquamquod ipse est excogitatum, nullis veterum monumentis probatum, ab Hæreticis pariter, et a Catholicis, qua

ipse

ipse confidentia asserit, prorsus negabitur. Quamobrem; ut ratum; firmumque sequentes propositiones contra Heterodoxos, et Anonymi sententiam propugnamus

36. Sanctum Petrum a Christo fuisse Apostolorum Principem constitutum omni argumentorum genere defendimus.

37. Cui in Primatus dignitate, et universali Episcopatu par non fuit ullus Apostolorum, quinimmo nec S. Paulus.

38. Dogma fidei est solum Petrum fuisse honoris, et jurisdictionis Apostolorum caput, et Ecclesie Christi Primatem.

39. Petrus propterea Romam venit, et ibi Martyrii palmam adeptus est.

40. Hæc facti veritas probatur invictissimis argumentis, quot vel nullum aliud Historiæ gestum.

41. His, aliisque rationibus S. Petrum fuisse Romanum Episcopum, universalem scilicet Ecclesie Hierarcham ad obitum usque evincitur.

42. Non satis firmis documentis defendi potest nullum Apostolorum fuisse Episcopum proprium, seu regionarium.

43. Nullis vero si de Romano Petri Episcopatu loquamur, dum ibidem, non ut regionarii Episcopi, sed ut universalis, sedem tenuisse dicimus.

44. Falsa pariter opinio est ab Apostolis, et a D. Petro ante Æræ vulgaris annum quinquagesimum septimum nullum constitutum fuisse Episcopum.

45. Presbyterorum Ordinem ante Episcopalem constitutum ab Apostolis fuisse omnibus Historiæ monumentis negamus.

46. Clementem Romanum, et non Linum primum fuisse Petri successorem in universalis Ecclesie regimine ab ipsomet Petro electum, nec Catholicorum traditioni, nec saniori Chronologiæ consonat.

47. Probabilius est Petro Linum successisse in universalis Ecclesie regimine, cui Cletus, Cleto Clemens, Clementi Evaristus, et cet.

48. Quamvis primi sæculi summorum Pontificum Chronotaxis valde implexa sit, nihil tamen obest, quin successores Petri omnes vere dicamus eadem Petri prærogativa Primatus gaudere.

49. Etsi non convenient Theologi, et Canonistæ in Primatialis jurisdictionis jura omnia decernenda, talem tamen de jure divino admittendam esse dicimus, quæ sit in fidei firmitate, et controversiis Religionis componendis accommodatam.

50. Graviter ergo peccant, qui primatum jurisdictionis vel negant omnino, vel ita minuunt, ut verbis illum fateantur, re tamen auferant et fidem.

F I N I S.

Disputabuntur Tarvisii in Seminarii Episcopalis  
Ædibus Academicis III. Idus Augusti  
MDCCLXXXIX.